



عشاء مع أصدقاء

دونالد مرجيليس

تجليات أدبية

ترجمة ومعالجة: عصام اللباد

عشاء مع أصدقاء

مسرحية عامة

عشاء مع أصدقاء

مسرحية عامية

تأليف : دونالد ميرجيليس

ترجمة ومعالجة : عصام اللباد

الطبعة الأولى ٢٠٠٧.

(c) دار ميريت

٦ (ب) شارع قصر النيل، القاهرة

تليفون / فاكس: ٥٧٩٧٧١٠ (٢٠٢)

www.darmerit.net

merit56@hotmail.com

الغلاف: أحمد اللباد

المدير العام : محمد هاشم

رقم الإيداع: ٢٠٠٦/٢١٨٩

الترقيم الدولي: 977-351-295-9

عشاء مع أصدقاء

مسرحة عامية

تأليف: دونالد مرجيليس

ترجمة ومعالجة: عصام اللباد

دار ميريت

القاهرة ٢٠٠٦

Dinner with friends

Donald Margulies

Pulitzer Prize For Drama 2000

The Outer Critics Circle for Best Off-Broadway Play, and

The Lucille Lortel Award for Best play.

Published by Theatre Communications Group Inc,

New York, 2000

المسرحية حاصلة على جائزة بوليتزر للدراما

وجائزة حلقة النقاد لأفضل مسرحية عرضت في برودواي

وجائزة لوسيل لورتيل لأفضل مسرحية سنة ٢٠٠٠

الفصل الأول

الشخصيات:

مرفت ومراد: زوجان، في أوائل الأربعينيات من العمر.
سليم وسوسن: زوجان، في نفس العمر تقريباً.
أصوات أولادهم.



المشهد الأول

(منزل مرفت ومراد. حجرة المعيشة.
مساء يوم الخميس، اليوم الأسبوعي للقاء الأصدقاء
والسمر.
مرفت ومراد عادا منذ أيام من رحلة.
معهما على العشاء اليوم سوسن وأولادها، كالعادة
الأسبوعية.
سليم زوج سوسن غائب اليوم، على غير عادته، في
رحلة عمل.
الأولاد جميعاً، أولاد مرفت ومراد وأولاد سليم
وسوسن، في حجرة بالداخل، يقضون وقتاً طيباً).

مرفت: ... بس الطريق كان فظيع.

سوسن: صحيح؟!

مراد: فظيع جداً.

مرفت: ياسلام يا اخويا!! وانت ايه اللي مضايقتك؟! ما انت

مارضيتش تسوق خالص. أنا كنت السوافة بتاعتك

طول الرحلة.

مراد: (لسوسن) ... والله يا سوسن كانت ولا سواقين
التاكسيات؛ ولا سواقين أحمد حلمي. أنا ما قدرتش
أسوق نهائي. كنت مرعوب م الزحمة وفوضى
الشوارع. كنت خايف أعمل جادثة نروح فيها. كانوا
ساعتها هيشحنوا جثثنا ف عربيات القطر التالجة
بتاعة اللحمة، وعلى عنوانكم. ما احنا مالناش
غيركم.

سوسن: يا ساتر عليك وعلى هزارك يا مراد.

مرفت: يا أخي اختار ملافظك. الملافظ سعد برضه.

مراد: وكننتي انتي وسليم هتربوا لنا العيال بقى. بس
اسمعي، إبقوا وكلوا العيال كويس. اطبخي لهم أكل
عليه القيمة، وبطلي أكل السوق بتاعكم ده.
(ترمقه سوسن بنظرة بها خليط من التعاطف
واستخفاف المزاح).

مرفت: إنت بجد فكرت ف كده!!!

مراد: طبعاً.

مرفت: والله انت عيان؛ محتاج دكتور نفساني.

مراد: يا فرحتك بجوزك العيان يا مرفت. (يضحك). يقبلان
بعضهما).

سوسن: ورحتوا الأقصر والألاً.

مراد: (في دهشة) نعم!!!

مرفت: ما كل ده كان ف الأقصر يا سوسن!

- مراد: الأول رُحنا أسوان يومين، بس كل اللي كنا بنحكيه
 ده كان ف الأقصر. صبح النوم.
- سوسن: والله كنت فاكر اكم لسه ف أسوان.
- مرفت: الظاهر كلامنا كان ممل جداً، مش كده؟
- سوسن: لا، أبداً والله.
- مرفت: طبعاً ممل جداً. أنا نفسي زهقت مننا.
- صوت
 طفل: (ينادي من الداخل) بابا. بابا. بابا. بابا.
- مراد: (ينادي). أيوه. عايز ايه؟
- الطفل: تعال شغل لنا الفيديو. عايزين نشوف الفيلم.
- مراد: ما تشغله بنفسك.
- الطفل: مش عارف أشغله. إنت تعال اعمله لنا.
- مراد: (متداخلاً مع "إنت تعال اعمله لنا"). أيوه تعرف
 تشغله يا يوسف. تعرف؛ وشغلته لوحداك كتير قبل
 كده. حط الشريط ودوس غ الزرار وخلص؛ صعبة
 دي؟!)
- الطفل: لأ. مش عارف. تعال انت اعمله.
- مرفت: (متداخلة مع "تعال انت اعمله") رُوح يا مراد اعمله
 وخلص.
- مراد: ما هو يقدر يشغله لوحده. ما هو عارف بيشتغل
 ازاي.
- الطفل: (صوت الطفل متداخلاً مع "هو عارف بيشتغل

- ازاي": بااااااااااا. عايزين نتفرج غ الفيلم).
 مراد: حوّل التليفزيون على القناة رقم ثلاثه الأول.
 الطفل: ايه؟ ... مش سامع.
 مراد: ثلاثة. القناة الثالثة.
 مرفت: والنبي يا مراد. عشان خاطري. أنا باتجنن لماً
 تقعدوا تصرخوا لبعض كده. رُوح شغلُه لهم
 وخلص. عشان خاطري.
 مراد: (صائحاً). طيب. أنا جاي اهه. (يبدأ في الذهاب، ثم
 لمرفت:) بس ما تحكيش عن أسوان إلا لماً ارجع.
 (يذهب. مرفت تبسم لسوسن في قلق.. إنها تحس أن
 هناك شيئاً ما ليس على ما يرام).
 مرفت: بس يا ستي. هي دي كل الرحلة. (صمت). وانتِ
 أخبارك ايه يا سوسن؟ عجبك الأكل؟
 سوسن: طبعاً. صينيّة البطاطس كانت فظيعة. كل حاجة
 كانت حلوة جداً. تسلّم إيدك.
 مرفت: بس يتهياً لي اللحمه كانت نيّة شويّة. كان لازم مراد
 يسيبها غ النار شويّة كمان.
 سوسن: لأ. خالص. كانت طايبة جداً.
 مرفت: إحنا دوشناكي بالكلام عن نفسنا النهار ده، مش كده؟
 .. معلش.
 سوسن: لا لأ. ما تقوليش كده. أنا فرحانة إنكم اتبسطوا ف
 الرحلة؛ .. وغيرانة منكم شويّة. الظاهر إنها كانت

رحلة حلوة بجد.

مرفت: جداً؛ وكنا محتاجينها جداً. بقى لنا كثير ما طلّعناش
رحلات لو حدنا. كنا خايفين نسيب العيال ونسافر.

سوسن: طبعاً.

مرفت: أصل أسبوع كثير برضه.

سوسن: طبعاً.

مرفت: وكانوا واحشينا جداً؛ كنا فُ سيرتهم طول الرحلة.

سوسن: طبعاً.

مرفت: بس كانوا كويّسين. طبعاً ماما هلكت معاهم فُ

الأسبوع ده. بس هم؛ المرّة الجايّة تيجوا معنا

انتي وسليم بقى. والله هتتسطوا جداً.

سوسن:

مرفت: هتبقى أحلى لو رُحنا كلنا مع بعض.

سوسن:

مرفت: إحنا الأربعة وخلص. أنا متأكّدة انكم هتحبوا أسوان

جداً.

سوسن: أنا متأكّدة. مش عارفة ليه عُمرنا ما فكرنا نرُوح

هناك.

مرفت: وممكن تسيبوا العيال مع عمّتهم. ما تخافوش؛ مش

هيجرى حاجة. العيال مش هيتضايقوا. صدّقيني.

دول يمكن كمان يتتسطوا إنهم من غيركم. دا يوسف

وكريم فتحو لنا الباب لمّا رجعنا، وبصّوا لنا ببرود

كده كأنهم بيقلوا لنا: "إنتم؟ تاني؟"، وسابونا
ومشيوا. دخلوا الأوضة بتاعتهم وقلوا الباب
وخلص. (تبتسمان. صمت) إخص عليك يا سليم.

سوسن: (بتوجس) ليه؟! قصدك إيه؟!

مرفت: يعني حبكت إنه يسافر النهار ده؟! ما كانش يعرف
يأجل يوم واحد ويقعد معانا؟!

سوسن: شغل بقى.

مرفت: ... هو اللي خسران على أي حال؛ ... راحت عليه
صينية البطاطس. (تبتسمان. صمت)

ما لك يا سوسن؟ إنتي كويسة؟ فيه حاجة؟

سوسن: يتهيأ لي جاي لي صداع نصفي.

مرفت: لأ؟! طبّ مددي جسمك غ الكنبه شوية كده؛ وبلاش
بقى القهوة دي دلوقت.

سوسن: أنا فعلاً ما قدرتش اشربها.

مرفت: أجيب لك قرص أسبرين؟

سوسن: ماشي. فكرة كويسة. ربنا يخليكي.

مرفت: (تحضر الأسبرين من الدولاب. تجد شيئاً) أنا كنت
هانسى. إحنا جبنا لكم هدية صغيرة م الأصر؛

حاجة صغيرة كده.

سوسن: فعلاً؟! ربنا يخليكم.

مرفت: حاجة صغيرة كده عشان البيت. (تعطي سوسن بيد
صندوقاً ملفوفاً وباليد الأخرى قرص الأسبرين).

- سوسن: (نتناول القرص مع بعض الماء) أفتحها دلوقت؟
 مرفت: زي ما انتي عايزة.
- سوسن: (تفضي غلاف الصندوق وتفتحه. آنية زهور جميلة من الفخار. تبدو على وجهها مسحة حزن)
 الله يا مرفت. جميلة جداً. متشكرة جداً.
 مرفت: دي للصالة بتاعتكم.
 سوسن: جميلة فعلاً.
- مراد: من الأقصر. إحنا استمتعنا بالرحلة دي جداً.
 هتخطيها ف الصالة؟
 مرفت: أيوه طبعاً.
- مراد: (يعود حاملاً خمسة من الأطباق الفارغة) فاتكم نص عُمركم. لو كانت الكاميرا معايا كنت أخذت لقطة العُمر.
- مرفت: ما فيهاش أفلام على أي حال؛ كل الأفلام خلصت ف الرحلة.
- مراد: .. العيال الخمسة مرصوصين قدام الفيلم وكلهم فاتحين بُقهم وملحوسين جيلاتي؛ ما تعرفيهمش من بعض؛ ورجل ده في بطن اللي جنبه، وودن ده ف بق اخوه؛ ... حاجة عجيبة. ما تعرفيش البق ده بتاع أي وش فيهم. والأدهى من كده انهم شافوا الفيلم ده بييجي خمسين مرة قبل كده؛ وكل مرة يعملوا كده برضه.

- (سوسن تتفجر في البكاء).
- مرفت: سوسن!!
- مراد: (متداخلاً مع "سوسن!!") إيه؟! فيه إيه؟! إيه الحكاية؟!
- (سوسن تتساب دموعها).
- مرفت: إيه يا سوسن؟! فيه إيه؟!
- مراد: (بحنان لمرفت). هو فيه حاجة حصلت وأنا جوه؟!!
- ميرفت: (تهز أكتافها، ثم:) سوسن؟! إيه اللي حصل؟!!
- سوسن: سليم هيسيبيني يا مرفت.
- مراد: إيه؟!!
- سوسن: هيسيبيني يا مرفت.
- مرفت: إنتي بتقولي إيه؟!!
- سوسن: ما بقاش يحبني خلاص. بيحب واحدة تانية. مشي وسابني. مشي خلاص. (تتفجر في البكاء تانية)
- مرفت: إيه اللي حصل؟!!
- مراد: بتتكلمي جد؟!!
- سوسن: ... (تومي برأسها).
- مراد: وهي مين دي بقي؟!!
- مرفت: (في دهشة) مراد!!!
- مراد: أنا بس عايز أعرف هي مين! واحدة نعرفها يعني؟!!
- مرفت: نعرفها والّا ما نعرفهاش؛ إيه الفرق يعني؟!!
- سوسن: مش عارفة؛ .. واحدة بتشتغل ف فندق.

مراد: بتشتغل ف فندق؟! سليم بيحب واحدة بتشتغل ف فندق!؟

مرفت: يا نهار اسود.

سوسن: ما هو كان بيسافر كثير الفترة اللي فاتت؟ ... اسمها لبنى.

مرفت: ومن إمتي يعرفها؟

سوسن: مش متأكدة. يمكن كام شهر كده.

مرفت: كام شهر!؟ ... وانت عرفتني إمتي؟

سوسن: الأسبوع اللي فات، وانتو مسافرين.

مراد: (برقة) يا ساتر يا رب.

مرفت: (لسوسن) إيه اللي حصل!؟

سوسن: هو اعترف لي. شدينا مع بعض ف الكلام شوية

كده. (تشهق) قال لي إنه تعيس معايا؛ إنه طول

الوقت تعيس ...

مرفت: نعم!؟!!

سوسن: (تكمل) ... تعيس جداً، من زمان جداً، لدرجة إنه

مش قادر يفتكر طعم السعادة دي إيه.

مراد: سليم قال كده!؟!!

سوسن: (تهز رأسها نعم) قال لي إن دي مش العيشة اللي

كان يتمناها لنفسه. إن العيشة معايا أكثر من كده

هتموته؛ هيموت ناقص عمر.

مراد: مش معقول!

- سوسن: (لمراد) إنت ما كانش عندك خبر بالحكاية دي؟!
ما قالكش حاجة؟!
مراد: (متداخلاً مع "حاجة") لأ، نهائي؛ ما كانش عندي أي فكرة عن الموضوع ده.
- مرفت: ما احنا كنا لسه بنتعشى مع بعض الأسبوع اللي فات!! ...
سوسن: أيوه.
مرفت: قبل ما نساقر على طول!! وكنا مبسوطين جداً، وعجبتنا الفراخ المشوية جداً!! كلنا كنا مبسوطين!!
سوسن: مضبوط؛ أنا فاكهة كويس.
- مرفت: وانتو الاتنين كان شكلكم عادي يعني؛ .. ما كانش باين عليه لا تعيس ولا يحزنون.
سوسن: عارفة.
مرفت: إنتي عايزة تفهميني إننا كنا قاعدين يومها مبسوطين ونازلين غ الأكل زي المفاجيع كده، وعمالين نضحك ونهزّر، وهو كان بيحب ف واحدة تانية ف سره!!
... كان قاعد معانا غصب عنه؟! .. وتعيس كمان؟!
سوسن: تتصوري؟! ...
مرفت: يا حبيبتي يا سوسن. قلبي معاكي. مش معقول اللي بيحصل ده. إزاي يعمل فيكي كده؟! أنا مش قادرة أصدق. (لمراد الصامت) ما تقول حاجة يا مراد.
عايز عزومة عشان تتكلم والأيه؟!!

مراد: (مدافعاً عن نفسه) إيه؟! أنا باسمكم. عايز أفهم اللي بيحصل ده.

مرفت: (لسوسن) مش هترُوحوا لأخصائي نفسي أو اجتماعي أو حاجة؟!!

سوسن: (تهز رأسها نفيًا) سليم مش راضي.

مرفت: إيه هو ده!! هي الحكاية لعبة؟! دول اتناشر سنة

جواز، .. وعيلين؛ ومش عايز حتى يحاول تاني؟!!

مراد: طَبُّ هو عايز إيه؟ طلب منك إيه يعني؟ انفصال مؤقت مثلاً والّا إيه يعني؟

سوسن: طلاق. هو عايز طلاق.

مراد: طلاق؟!!

مرفت: إيه الكلام الفارغ ده؟!!

سوسن: هو قال لي كده. قال لي إنه حاول كثير؛ إنه طول

السنين اللي فاتت دي بيحاول يحافظ غ الجواز؛ وإنه

مش قادر أكثر من كده.

مرفت: (في غضب) إزاي يعني؟! حاول ازاي يعني؟! عمل

إيه؟! وهو إيه ده اللي ما نفعلش؟! أنا عايزة اعرف.

الجواز ما نفعلش.

سوسن: أنا فعلاً مش قادر استوعب اللي بيحصل ده! مش

مراد: قادر أصدق إن اللي بتتكلمي عنه ده يبقى سليم! إنتي

أكيد بتتكلمي عن حد تاني. زي ما يكون اتبدل بحد

تاني. زي ما يكون لبسه عفريت والّا حاجة.

لا لأ. مش ممكن! فيه حاجة غلط! ما تاخديه لدكتور

مرفت: نفساني؟

كل الحكاية إنه بيكرهني؛ بيكرهني جداً. قال لي إني
سوسن: بوّظت حياته كلها.

كلامه ده معناه إن فيه حاجة غلط؛ .. فيه حاجة احنا
مرفت: مش عارفينها.

مش كده؟! .. أنا رأيي كده برضه.

سوسن: يمكن المراهقة المتأخرة أو أزمة منتصف العمر اللي

مرفت: بيقولوا عليها دي والأ حاجة؟! يا ريت يا شيخة كنتم
جيتوا معانا أسوان.

أنا يتهيأ لي إنه واقع ف مشكلة. أنا قلت له كده.

سوسن: حاولت أفهمه إن كل مشكلة ولها حلال؛ زعل أكثر
واكثر.

مرفت: طبعاً كل مشكلة ولها ألف حلال؛ ... واحنا لازم
نقف جنبه ونساعده مهما كانت المشكلة.

سوسن: ربنا يوفقكم. اعملوا اللي عايزين تعملوه. بس انتم

عارفين سليم؛ عمره ما هيوافق يروح لدكتور والأ
أخصائي. ده بيشك ف كل أنواع العلاج. أنا بس
خايفة عليه والله. ده ممكن يحصل له انهيار عصبي
كده.

مرفت: ما فيش احتمال يكون بدأ ياخذ مخدرات والأ
حاجة!!؟

- مراد: مرفت!
- مرفت: أمال تفسر اللي بيحصل ده ازاي؟! تفسره ازاي؟! ده انقلاب ف الشخصية.
- سوسن: أنا يا مرفت دماغي عمال يوذي ويجيب. عماله أفكر ف كل حاجة حصلت من يوم ما اتجوزنا لحد دلوقت، كل ثانية، كل تنتوفة، كل كلمة. مش عارفة ألاقى سبب.
- مرفت: أنا متأكده يا سوسن إنه بيحبك؛ بيحبك جداً. أنا شفت ده. كلنا شفنا ده. الناس ما تقدرش تمثل الحب كده يا سوسن، لأ.
- سوسن: (متداخلاً مع "لأ"). والحاجات اللي قالها لي دي يا مرفت؟! كل الكلام اللي قاله ده معناه ايه؟! ... لا يا مرفت. ده كلام راجل بيكره مش بيحب. لا لأ، صدقيني. سليم بيحب الست الثانية دي. أنا متأكدة. ده بيقول لي إن فيها كل حاجة مش في.
- مرفت: يعني ايه بقى!!?
- سوسن: وإن حياتها كلها له: بتسمع كلامه؛ موجودة ف الدنيا دي عشانه؛ .. هي بتقول له كده.
- مرفت: تبقى كذابة؛ نصابة.
- سوسن: فعلاً يا مرفت. الكلام اللي بتقوله له زي الكلام اللي مكتوب على كروت البوستال بتاعة الحبيبة. زي كلام الشعر الخايب. وتصدقي بيقول لي ايه كمان:

بيقول لي إن انا بادِّي لُه خمسة وسبعين فُ الميَّة،
وهي بتدِّي لُه مئة وعشرين فُ الميَّة.

مرفت: هو قال لك كده؟! مئة وعشرين فُ الميَّة؟!!!

(وسوسن تهز رأسها متعجبة ورافضة) هو بقى
يحسب النسب المئوية كمان؟! عال والله. طب وإيه
بقى العشرين الزيادة دول؟! العشرين اللي فوق الميَّة
دول بتوع إيه بقى؟!

(سوسن ومراد ينظران إليها).

مراد: مرفت!

مرفت: نعم؟! عايز إيه؟! (ثم لسوسن تهكماً على سليم:)

وانتي بقى خايبة وفاشلة؟! مش قادرة تذاكري كويس
عشان العشرين فُ الميَّة دول؟! ... طب ما يجيب
لك مدرس خصوصي!!

سوسن: أنا الظاهر مش قدها.

(صمت).

مرفت: بُصِّي يا سوسن، إحنا هنتكلم معاه. مراد هيتكلم

معاه.

مراد: طبعاً هاتكلم معاه.

سوسن: (متداخلة مع "هاتكلم معاه".) لا يا مرفت. لا تتكلموا

معاه ولا حاجة أبداً. مافيش حاجة تتكلموا فيها.

خلاص، لو هو عايز يمشي، سيبوه يمشي. وانا قلت

لُه إنني هاعمل لُه اللي هو عايزه؛ أي حاجة هو

عايزها.

مرفت: إنتي كنتي عارفة يا سوسن إنه تعيس للدرجة دي؟
سوسن: طبعا لأ هو بيقول لي إني كنت عميا. إني ما قدرتش
اشوف كل العلامات والشواهد؛ وإني ما قدرتش
اسمعه. أنا مش فاهمه المفروض كنت أسمع إيه!!
هو كان بيتكلم معايا خالص؟! ده عُمره ما فتح لي
قلبه؛ وكان دائما مزاجه وحش ومقلوب. أيوه والله؛
وذهنه مُشنت. أنا كنت فاكرة إن الشغل هو السبب؛
أو إن السفريات الكثيرة بتاعة الشغل هي السبب.
كنت ساعات ألاقيه قاعد سرحان ومبطلق ف الهوا
كده. ولما كنت أسأله بيفكر ف إيه، كان يقول لي
"مافيش".

(مرفت ترمق مراد بنظرة قاسية. يبدو أن هذا
الموقف مألوف لها أيضا).

مراد: إيه؟! بتبصني لي كده ليه؟!

مرفت: (تهز رأسها دون كلام).

سوسن: أنا مش فاهمة إيه اللي بيحصل. يتهيا لي إنه بيمر
بحاجة كده. بس مش عارفة هي إيه.

مرفت: حاجة زي إيه يعني؟!

سوسن: مش عارفة. أو يعني، ... بلاش، ... مش عايزة
اتكلم ف الموضوع ده.

مرفت: طيب؛ على راحتك.

سوسن: قصدي حاجة مش كويسة يعني، .. حاجة مش
مضبوطة، .. يعني ..حاجة جنسيّة وكده.

مراد: نعم!!؟

سوسن: إحنا كنا ف السينما من كام أسبوع كده، فيلم أكشن
خايب كده، ولاقيته ماسكني من وسطي ف قلب
السينما وعايزني أعمل مش عارفة إيه. بصّيت له
كده وقلت له "إيه يا سليم؟! إنت اتجننت والا إيه?!".
بس؛ .. ما قلتش أكثر من كده. زعل جداً جداً.

مرفت: الحكاية دي قبل والأ بعد ما يعرف الست دي؟

سوسن: أكيد بعد.

مراد: طبعاً بعد.

سوسن: زي ما يكون بيعمل لي اختبار وعايزني أسقط فيه.
عايز يعمل مقارنة بيني وبينها، وعايزني أطلع
وحشة.

مرفت: كان عايز "يؤكد لنفسه أسبابه".

سوسن: بالظبط كده. إنتي قلتي التعبير الصح: "يؤكد لنفسه
أسبابه".

مراد: شفّتي بقى يا سوسن. يعني لو كنتي مبحباها شويّة؛

... لو كنتي بطلّتي التزمّت بتاعك ده، ما كانش ده

حصل.

مرفت: مراد!!

مراد: أنا آسف؛ ما كانش قصدي.

- مرفت: (لسوسن) معنى كده بقى إنها السبب ف سفرياته
الكثير دي، مش كده؟
- سوسن: (سوسن تومى برأسها موافقة بشدة وتعقل).
صوت
- طفل: (من الداخل): باباااا. الشريط باظ تاني. تعال صلح
لنا الشريط.
- مرفت: يا ربّي. إيه حكاية العيال دول النهار ده؟! مش انت
صلحته؟
- سوسن: (تهز رأسها في أسى).
(صوت أطفال من الداخل: باباااااااااا).
- مرفت: (تصرخ) ما خلاص، سمعناكم. بطلوا صريخ.
(لسوسن) وهتقولوا للعيال؟
- سوسن: الحقيقة مش عارفة. الأيام دي هو بيسافر كثير قوي.
وبتهدياً لي ما فيش لزوم نستعجل ونقول لهم دلوقت.
مش كده برضه؟ صحيح العلاقة بيننا مش تمام
دلوقت؛ بس ما هي طول عمرها كده. والعيال لسّه
مش ملاحظين حاجة؛ ... وبعدين هو مسافر أغلب
الوقت على أي حال.
- (صوت طفل: باباااااااااا. الفيلم باظ تاني).
- مراد: (صارخاً في نفاذ صبر) المفروض إنك دلوقت
تعرف تصلحه يا يوسف.
- (صوت طفل آخر متضامناً مع يوسف على ما يبدو:

- مش عارف يصلحه).
 مراد: مش انا لسه معلمك تصلحه ازاي يا يوسف؟! لحقت تنسى؟!
 مرفت: مش بابا قال لك تصلحه ازاي يا يوسف؟!
 مراد: دوس الزرار اللي مرسوم عليه زائد وناقص.
 مرفت: مراد، بلاش صريخ يا ...
 مراد: أنا رايح اعمله لهم.
 مرفت: لأ. خليك انت. أنا رايحة.
 (أصوات الأطفال: لسه بايظ. الصورة بتطلع وتنزل).
 مرفت: أنا جايه لكم اهه.
 (تخرج مرفت. مراد وسوسن وحدهما يعرض مراد على سوسن مزيداً من الشاي. تهز رأسها رافضة. لحظة صمت).
 مراد: وكل الأجازات اللي قضيناها سوا، إسكندرية وراس البر والفيوم...،...؛ إنتم اتعرفتوا على بعض عندنا ف شقة اسكندرية اللي اتجوزنا فيها، مش كده؟ (صمت) فاكرة الصيفية اللي انتي ومرفت كنتم حوامل فيها؟
 (سوسن تهز رأسها. يجتران الذكريات في صمت. مراد يهز رأسه في أسى).
 (أصوات الأطفال ثانية، لكن في فرحة: هيبيبه).

مراد: بس ازاي سليم يقدر يعمل كده؟! أنا مش فاهم.
إزاي يقدر

مرفت: (تقف مشتتة الذهن) أنا لازم اخد العيال بقى. الوقت
اتأخر؛ إحنا لازم نروّح. (تلتقط من الأرض فردة
حذاء أحد أطفالها من رباطها وتبحث عن الأخرى).

مرفت: ما شفتش الفردة الثانية يا مراد؟

مراد: (ياخذ يدها بحنان) ما تزعليش يا سوسن. كل حاجة
هتتصلح إن شاء الله.

سوسن: إنت كان رأيك م الأول إن سليم ما يتجوزنيش، مش
كده؟

مراد: إيه؟!!

سوسن: عادي يا مراد. أنا عارفة من زمان. سليم قال لي.

مراد: أنا عمري ما قلت كده.

سوسن: عادي؛ ولا يهملك. أنا بس كنت بافكر بصوت عالي.
إنت يمكن كان عندك حق.

(مرفت تعود. تلاحظ التوتر. تحتضن سوسن.)

مرفت: تيجوا ناكل الكنافة بقى؟

سوسن: ياه. لأ. آه. مش عارفة. أنا لازم اروّح العيال بقى.
هيناموا مني.

مراد: لسه بدري يا سوسن. أقعدوا شوية. العيال لسه
مصحصحة وبيتفرّجوا غ الفيلم، وعينهم مفرّجة قد
كده.

سوسن: ماشي. والله عندك حق. أنا مستعجلة ليه؟! هاروَح
لمين يعني؟! (تجلس).

مرفت: (لمراد وهي تشير لصينية على الطاولة) مش عايز
تتشرف حضرتك بقي وتتنازل وتقطع لنا صينية
الكنافة؟

مراد: طبعاً.

سوسن: أنا متأسفة بجد إني حطيت على أكتافكم الحمل الثقيل
ده.

مراد: (رافضاً ما تقول) ما نقوليش كده يا سوسن.

مرفت: إيه الكلام العبيط ده يا سوسن.

سوسن: دي آخر حاجة كنتم تتوقعوها النهاردة، صح؟
(مراد يتعامل بمهارة مع صينية الكنافة، بينما تصب
مرفت الشاي).

سوسن: الله، شكلها حلو قوي الكنافة دي. معمولة ازاي دي؟

مراد: باللمون.

سوسن: لمون؟!!

مراد: أيوه لمون، غريبة دي؟! ده اختراعي الجديد.

سوسن: الله. (تذوقها) الله.

مرفت: (تذوقها أيضاً وتوافق) رائعة.

مراد: (يتذوقها ويمدح نفسه)

عظمة على عظمة يا واد يا مراد.

سوسن: بس مش اللمون كثير شوية؟

مراد: (يَذْوِقُهَا مَرَّةً أُخْرَى وَيَعِيدُ التَّفْكِيرَ) يُمْكِنُ .

سوسن: بَسُّ حَلْوَةٍ بِجَدِّ . تَسْلَمُ إِيدِكَ يَا مُرَّ .

تَسْلَمُ إِيدِكَ يَا مُرَادَ . (تَنْتَهَدُ) أَنَا حَاسَّةٌ إِنِّي بَقِيْتُ أَحْسَنَ
بَعْدَ مَا حَكَيْتُ لَكُمْ . أَنَا كُنْتُ قَاعِدَةٌ طَوَّلَ اللَّيْلِ
هَانَفَجَرُ ؛ كُنْتُ عَمَّالَةٌ أَفْكَرُ أَقُولُ لَكُمْ وَالْأَلَا . بَسُّ أَنْتُمْ
أَقْرَبُ أَصْحَابِي ؛ مَا لَيْشَ غَيْرِكُمْ . إِنْتُمْ عَارِفِينَ كِدَهُ
طَبْعاً .

مراد: طَبْعاً .

سوسن: أَصْحَابُ عُمُرِي . إِنْتُمْ اللَّيُّ لِي فِي الدُّنْيَا دِي . (الْجَمِيعُ

يَأْكُلُونَ فِي صَمْتٍ) الْكِنَافَةُ جَمِيلَةٌ بِجَدِّ .

(تَنْتَهِي قَطْعَتَهَا ، تَضَعُ الطَّبِيقَ . مُرَادٌ وَمَرَفَتٌ يَأْكُلَانِ
فِي حَزْنٍ) .

(تَخَفَتِ الْإِضَاءَةَ تَدْرِيجِيًّا حَتَّى يَظْلَمَ الْمَسْرُوحُ) .

المشهد الثاني

(متأخراً قليلاً في نفس الليلة.
حجرة نوم سوسن وسليم.
الحجرة غير مرتبة.
تأتي الإضاءة من "أباجورة" جانبية خافتة.
أعمدة من الكتب والمجلات و الملابس منتشرة في
كل مكان.
سوسن في ملابس النوم. تبدو هشة. على وشك أن
تدخل سريرها.
يُفتح باب الحجرة فجأة فتزعج. تشهق خوفاً.
يدخل سليم وهو يفرك يديه من البرد. يقف بالمدخل.
حزمة ضوء من الصالة تعبر الباب وتضيء الحجرة
أكثر).

سوسن: سليم؟! رعبتني.

سليم: متأسف. ما كنتش أقصد إني ...

سوسن: يعني ما كنتش تقدر تخبط قبل ما تدخل؟!!

سليم: متأسف.

سوسن: ما ينفعش كده يا سليم. إنت ما تقدرش تدخل وتخرج

- كده زي ما انت عايز . الدنيا مش على مزاجك
يا سليم .
- سليم: ششش ...
- سوسن: اللي بتعمله ده ظلم . لو كنت عايز تمشي ، امشي
وخلص .
- سليم: أنا بس كنت ...
- سوسن: وإلا هاغير كوالين البيت كله .
- سليم: للدرجة دي؟! أنا مش مصدق إنك عايزة تعملي كده .
- سوسن: لأ عايزة . وده اللي هاعمله فعلاً .
- سليم: بُصِّي يا سوسن؛ ... أنا مش جاي أتخانق . خلاص؟
...أنا شفت النور موّلع؛ قلت إنك أكيد صاحية؛
وقلت أدخل اشوفك عاملة إيه؛ بس كده .
- سوسن: عامله إيه؟! .. بس كده؟! .. وبعدين انت مش ف
اسكندرية ليه!!?
- سليم: السكة مقطوعة . فيه عربيّة مقلوبة ف الصحراوي؛
والمطر كمان وحش قوي الليلة دي .
- سوسن: وما أخذتش القطر ليه؟
- سليم: ما لحقت هوش .
- سوسن: ما كنت خلّيت صاحبك بتاعة الفنادق دي حجزت
لك أوضة ف فندق م اللي بتستغل فيهم دول .
- سليم: قلت لك إنها مش بتستغل في فنادق يا سوسن . دي
مندوبة العلاقات العامة بتاعة الشركة . وبعدين أنا

اتصلت بيها فعلاً.

سوسن: وبعدين؟! ما قدرتش تلاقى لك حجز؟! ... طب ما
رُحش تنام عندها ليه؟! ما ينفعش!؟

سليم: الحقيقة لأ؛ ما لقيش حجز. وبعدين أنا كنت قُرب م
البيت؛ وكل اللي فكرت فيه إني آجي أشوفكم.
(تتصادم الأعين) وما تقلقش؛ أنا هانام ف الصالة
برة.

سوسن: هو مين ده اللي يقلق!!؟

سليم: طيب يا سوسن. كل الحكاية إني كنت عايز أطمئن
عليكم.

سوسن: وسخة جداً.

سليم: إيه؟! نعم!!؟

سوسن: الجزمة. جزمتك كلها طين. السجادة باظت خالص.

سليم: معش. متأسف. (يجلس ليخلع حذاءه) أنا دخلت
بصيت غ العيال. دول غرقانين ف النوم؛ زي ما
يكونوا لسه مخلصين ماتش كورة.

سوسن: فعلاً. اتبسطوا جامد النهار ده عند مرفت. علي نام
مني ف العربية وشيلته على قلبي لحد السرير، ولا
فتحش عينيه مرة واحدة.

سليم: الواد ده بيشخر جامد قوي لمأ يكون تعبان. بيسحب
الهوا زي ما يكون شفاط قطر بضاعة. الواحد خايف
عليه أحسن مرة من دول دماغه تفرقع زي البالونة.

- سوسن: الظاهر داخل عليه دور برد.
- سليم: (بتعاطف.) تاني؟!!
- سوسن: مناخير ه كانت سايحة طول الليل. إديته نوفالجين قبل ما نمشي من عند مرفت.
- سليم: نوفالجين أقراص والأشرب؟
- سوسن: شرب.
- سليم: ورضي يشربه؟! مش عادته يعني! إنتي فاكرة وهو صغير لماً كان يحب يمثل إنه عيان وبيرجع.
- (سوسن تبدو غير مرتاحة من نبرة الألفه والراحة في صوته. تحاول تغيير الموضوع).
- سوسن: أيوه فاكرة. سليم، لو سمحت، أنا عايزة ابقى لوحدي شوية؛ .. بعد إذتك.
- سليم: طبعاً طبعاً. آه طبعاً.
- سوسن: هتلاقي غطيان ف الدولاب الصغير.
- سليم: ماشي.
- سوسن: أنا لميت الغطيان وخطيتهم ف الدولاب. أنا كنت فاكرة إنك مسافر ومش راجع النهار ده.
- سليم: مفهوم. أنا ...
- سوسن: ويمكن تحتاج بطانية زيادة. الليلة دي برد.
- سليم: ماشي. شكراً. (يقوم ويفتح الدولاب ليخرج الأغطية.
- يرى هدية مراد ومرفت) إيه دي؟
- سوسن: هدية من مرفت ومراد، م الأقرص.

- سليم: أخبارهم إيه؟
- سوسن: كويسين. ما انت عارفهم، دايماً كُرمًا ويحبوا يبسطوا الناس.
- سليم: وطبعاً مراد طبخ لكم كالعادة. طول النهار يطبخوا.
- سوسن: أحلى حاجة كانت كنافة اللمون اللي مراد عملها بنفسه.
- سليم: الله. حتى اسمها طعمه حلو. ما جبتيش حتة معاكي؟
- سوسن: لأ.
- سليم: والعيال، أكلوا منها والأ لأ؟
- سوسن: لأ طبعاً. هم دول بيعرفوا ياكلوا. دول عايزين طول النهار همبُرجر وزفت؛ أي لغوصة وخلص. مراد عمل لهم مكرونة اسباجيتي. بس برضه كانت حلوة. (صمت.)
- سليم: وأخبارهم إيه؟
- سوسن: ما قلت لك كويسين. عادي يعني. ما بطلوش كلام عن الرحلة. الحمد لله إن الصور كانت لسّه ما اتحمضتتش، وإلا كانوا قعدوني معاهم أسبوع كمان.
- سليم: (صمت.) وبعدين؟ قلتي لهم إيه؟
- سوسن: قلت لهم إيه عن إيه؟!
- سليم: عني يعني.
- سوسن: عنك؟!
- سليم: عن إني ما رحتش معاكم يعني.

- سوسن: قلت لهم انك ف اسكندرية.
- سليم: بس كده؟! ... وقبلوا الاعتذار يعني؟
- سوسن: طب ومش هيقلوا ليه؟! ما هم عارفين انك مسافر طول الوقت؛ تيجي من هناك تروح هناك.
- سليم: فعلاً. بس ما جالهمش شك ف حاجة كده يعني؟! لا.
- سوسن: طب قالوا ايه؟
- سوسن: قالوا ايه يعني ايه؟! قالوا ايه عن ايه يعني؟!
- سليم: عن ايني ما كنتش هناك يعني.
- سوسن: قالوا انهم كانوا نفسهم تكون معانا. كانوا زعلانين.
- سليم: زعلانين من ايه؟! من انك ما كنتش هناك. ايه يا سليم؟! هو تحقيق والاً ايه؟ ... بـص بقى يا سليم: أنا فعلاً تعبانة وعايزة انام.
- سليم: أنا بس كنت عايز أعرف انتو اتكلمتوا ف ايه؛ بس كده. فيها ايه دي يعني؟! ما أنا قلت لك؛ الأقصر وأسوان وحاجات كده.
- سليم: وحاجات كده يعني ايه؟
- سوسن: مش عارفة بقى. مش عارفة. مش معقول كده. اتكلمنا عن حاجات كثير، ف اللي طول عمرنا بنتكلم فيه.
- سليم: أنا مش عارف احنا كنا طول عمرنا بنتكلم ف ايه!!

أنا يتهياً لي إني عمري ما اتكلمت!
سوسن: إتكلّمنا عن الأفلام، والعيال، والأسعار، والسياسة،
وحاجات حصلت لنا، ونكت، وأم مرفت، والميّه
البيضا اللّي جت لها ف عينيها، وانها لازم تعمل
العملية وخايفة، ...

سليم: وبس؟!

سوسن: ومراد قعد يحكي لنا شوية نكت. بس. مش فاكرة
بقي.

سليم: إنتي قعدتي عندهم أكثر من خمس ست ساعات، مش
كده؟! من خمسة لعشرة ونص؛ يعني خمس ساعات
ونص.

سوسن: كفاية بقي لو سمحت.

سليم: وكل الوقت ده بتتكلّموا طبعاً. أنا عارف. وعايضة
تقولي لي إن خمس ساعات كلام ما جاتش فيهم
سيرتي؟! ما فيش كلام عننا أنا وانتي؟!

سوسن: إنت طول عمرك كده. طول عمرك شكّاك. مش ف
الشغل كانوا مسميينك أبو ريبّة؟ مش كده برضه؟

سليم: والله!!! أنا اللّي شكّاك يا سوسن!

سوسن: (تدخل تحت الغطاء وتستدير مبتعدة بوجهها عنه) أنا
ما عنديش دماغ للكلام ده.

سليم: إنتي قلتي لهم.

سوسن: نعم!!!

- سليم: قَلْتِي لَهُمْ.
- سوسن: يَا رَبِّي.
- سليم: أَنَا لَمَّا أَبْصَرَ لَكَ يَا سوسن أَعْرَفَ الَّذِي فِ دِمَاغِكَ.
- سوسن: شَشَشْ. وَطَي صَوْتِكَ. عَايِزْ تَصْحِي الْعِيَالِ وَالْأَيَّاهُ!!؟
- سليم: إِحْنَا اتَّفَقْنَا إِحْنَا هُنْجِيْب حَدْ يَقْعِدْ مَعَ الْعِيَالِ، وَإِنْنَا هُنْرُوحْ لَهُمْ وَنَقُولْ لَهُمْ سَوَا، وَجِهًا لُوْجِهْ، مَعَ بَعْضٍ؛ صَحْ؟ .. فَكْرَةٌ يَا سوسن وَالْأَنْسِيْتِي!!؟ .. أَنَا مَا طَلَبْتَشْ مِنْكَ حَاجَةٌ غَيْرَ كَذِهِ. قَلْتِ لَكَ اسْتَنْبِيْنِي
- يا سوسن لَحْدْ مَا ارْجِعْ مِ السَّفَرِ وَنَرُوحْ نَقُولْ لَهُمْ سَوَا. صَحْ؟ مَشْ دِهَ الَّذِي حَصَلَ؟
- سوسن: لَوْ كَانَ الْمَوْضُوعُ ذَهْ مَهْمٌ عِنْدَكَ كَذِهِ يَا أَخِي، كُنْتُ أَجَلْتُ سَفْرَكَ وَجِيْتُ مَعَايَا النَّهَارِ ذَهْ، بَدَلْ مَا تَرُوحْ تَجْرِي وَرَا بَتَاعَةَ الْفَنَادِقِ بَتَاعَتِكَ دِي.
- سليم: يَبْقَى قَلْتِي لَهُمْ فَعَلًا. يَا سَاتِرْ عَلِيْكَ يَا سوسن.
- يا سَاتِرْ يَا رَبِّ. إِنْتِي بَشْعَةٌ. وَالْعِيَالُ كَانُوا فِينْ!!؟
- سوسن: كَانُوا فِينْ يَعْنِي أَيَّاهُ!!؟
- سليم: الْعِيَالُ كَانُوا فِينْ لَمَّا قَلْتِي لَهُمْ!!؟
- سوسن: مَشْ عَارِفَةٌ.
- سليم: مَشْ عَارِفَةٌ!!؟ كَانُوا قَاعِدِيْنَ مَعَاكُمْ!!؟
- سوسن: لِأَطْبَعًا. كَانُوا بِيْتَفْرَجُوا غِ الْفِيْلِمِ جُوْهُ يَتَهَيَّا لِي؛

- بيتفرجوا غ الفيلم.
- سليم: بيتفرجوا على ايه؟ فيلم ايه؟
- سوسن: نعم؟!
- سليم: فيلم ايه اللي كانوا بيتفرجوا عليه؟
- سوسن: ما اعرفش. فيلم وخلص. كارتون، اسماعين ياسين، جاكى شان، .. أي فيلم وخلص.
- سليم: أي فيلم وخلص؟! جاكى شان؟! اسماعين ياسين؟! حتى مش عارفة ولادك كانوا بيتفرجوا على ايه؟! طيب، هم كانوا جوّه ف الأوضة بيتفرجوا غ الفيلم، إنتوا بقى كنتو فين؟ قاعدين فين يعني؟ ف الصالة، مش كده؟
- سوسن: (بفتور) غ السفارة.
- سليم: كنتم بتاكلوا؟
- سوسن: كنا خلصنا أكل؛ قبل الكنافة بالظبط.
- سليم: كنافة اللمون؟
- سوسن: أيوه.
- سليم: طيب؛ كنتم قاعدين غ السفارة و....
- سوسن: مش ممكن!! أنا مش مصدقة اللي بيحصل ده!!
- سليم: قولى لي.
- سوسن: كنا قاعدين غ السفارة، ... وأنا ما قدرتش اخبى أكثر من كده. انفجرت.
- سليم: يا دي المصيبة. عيظتي لهم يا سوسن؟! عيظتي؟!

سوسن: أيوه عيَّطت. كنت متوقع إيه يعني؟! أزغرد؟! ..
طبعاً عيَّطت.

سليم: ...

سوسن: إنت حُط نفسك مكاني. ما أنا بني آدمه يا أخي؛
قاعدة وسط أعز أصحابنا؛ والعيال حوالينا

سليم: أنا مش مصدِّق إنك عملتي كده.

سوسن: (تكمل) ... بناكل ونشرب ونضحك؛ وأنا طول
الوقت بامتئِّل إني كويِّسة وإن كل حاجة تمام؛ ... ما
قدرتش استحمل ده.

سليم: مش مصدِّق إنك عملتي كده.

سوسن: وبعدين إيه المشكلة يعني؟! طبَّ عرفوا وخلص؛
إيه يعني؟! ما هم كانوا لازم يعرفوا.

سليم: مش دي النقطة. النقطة إنك جريتي وسبَّقتي عشان
تكسبي تعاطفهم؛ .. عشان تشحنيهم ضدي.

سوسن: نعم!!! لا طبعاً.

سليم: طبعاً كسبتيهم فُ صِفِّك ضدي. سبَّقتي وحكيتي لهم.

سوسن: سليم...

سليم: (مستمراً) لمَّا يسمعوا القصة بتاعتك، من وجهة
نظرك، طبعاً لازم يتعاطفوا معاكي. ده طبيعي.

وياخدوا موقف مني طبعاً.

سوسن: بطل شك بقى. ما حدِّش واخذ مواقف من حد.

سليم: ما تعمليش نفسك ساذجة. إنتي عارفة قصدي

كويّس. وأنا مش هافوت الحكاية دي على خير يا
سوسن.

سوسن: نعم؟!!

سليم: (يكمل) مراد ومرفت دول مُهمّين عندي جداً؛ ومش
هاسمح لك تبوّظي علاقتي بيهم أبداً.

سوسن: أنا مش عارفة انت مكبر الموضوع قوي كده ليه؟!!

سليم: ما تقوليش مكبر الموضوع. إنتي عارفة كويّس إنه

موضوع كبير؛ ..إنه موضوع مهم عندي؛ ..ويمكن
بالذات عشان عارفة كده رُحتي قلتي لهم لوحدك. ده
سبق إصرار وترصد يا سوسن. إنتي بالعمد خلّيتهم
يتحيزوا معاكي ضدي.

سوسن: أنا ما عملتش كده يا سليم. كل اللي عملته إني حكيت

لهم اللي حصل، بعدالة، بموضوعية.

سليم: بعدالة؟! موضوعية؟! ده انتي شغلتي مكنة الدموع

طول القعدة. فين الموضوعية دي بقى؟

سوسن: أنا ما شغلتش مكن يا سليم. عيب تقول كده.

سليم: إنتي كنتي رايحة ومخططة تقولي لهم كل حاجة.

سوسن: مش حقيقي. أنا حاولت ما اقولش. حاولت أمسك

نفسي وأحبس دموعي؛ بس ما قدرتش. الحاجات
طلعت من بقى كده وخلاص.

سليم: طلعت كده وخلاص؟! طبّ قولني لي: إيه اللي طلع

وخلاص؟ إيه اللي طلع من بقتك يا سوسن؟

- سوسن: بُص بَقِي؛ أنا تَعْبَانَة والموضوع ذَه مقرف. إنت ما
تَعْبِئْش يا سليم!!؟
- سليم: أنا عايز أعرف إنتي قُلْتِي إيه. لازم اعرف. من
حَقِّي أعرف.
- سوسن: ما انت عارف كل الحكاية. ما انت بطل الحكاية.
عايزني أقول لك إيه؟! إنت قُولها لنفسك وخلص.
- سليم: ولمَّا انتي كنتي ناوية تتكلمي بلساننا احنا الاتنين،
كنتي على الأقل ..
- سوسن: أنا حكيت اللي حصل وخلص.
- سليم: كل حاجة؟!؟
- سوسن: أيوه.
- سليم: وهم قالوا إيه؟
- سوسن: اتصدموا. كانوا حزنانيين جداً.
- سليم: فعلاً؟!؟
- سوسن: أمال انت كنت فاكِر إيه؟! ذول أعز اصحابنا. عَشْرَة
عُمُر. اتصدموا طبعاً.
- سليم: كانوا زعلانين عشانك طبعاً، مش كده؟
- سوسن: عشانِي، وعشانك، وعشان العيال، ...
- سليم: وقُلْتِي لهم على كل اللي عملتيه في؟!؟
- سوسن: ...
- سليم: قُلْتِي لهم إنك قُتَلْتِي نَفْسِي فِ نَفْسِي؟!؟
- سوسن: تاني يا سليم!؟

سليم: قلتي لهم انك رفضتي تسمعيني؟! .. واني حاولت
اخليك تهتم بي وتسمعيني، سنين وسنين، وانتي
ولا هنا؟! .. قلتي لهم كل ده؟!
سوسن: كفاية كده لو سمحت. كفاية.

سليم: انا كنت باصرخ عشان تسمعيني وتحسي بي. ومش
مرة ولا اتنين، طول الوقت.

سوسن: انت عملت ايه يعني يا سليم عشان احس بيك؟!
هه؟! رحت عرفت بتاعة الفنادق دي علي؟!!

سليم: يا حول الله يا رب. قلت لك مش بتشتغل ف فنادق.
مندوبة علاقات عامة؛ علاقات عامة يا سوسن.

سوسن: وبعدين ايه الصرخة اللي انا ما سمعتهاش دي بقي؟!
صرخة زي الصريخ اللي بنعرفه كده؟! اللي بنسمعه
بودانا؟! والا قصدك موجات صوتية من اللي ما
بيسمعهاش غير الكلاب دي؟! انت صرخت ازاي
يعني؟! وريني كده؟

سليم: ماشي يا سوسن، كملي يا سوسن. كملي علي.
إدبحيني كمان وكمان. إترقي علي. إخصيني كمان
وكمان.

سوسن: والنبي تبطل الكلام بتاعك ده. انا شبعت م الكلام ده.
سمعتة ألف مرة. انا مش مصدقة إن واحد بعد
انتاشر سنة جواز يبجي يقول كلام زي ده.

سليم: أهه. لحد دلوقت؛ .. لحد اللحظة دي مش عايزة

تسمعيني؛ وبتسَخفي كلامي؛ ودايماً عندك ردود
تسكتيني بيها وتغلبيني بيها. لحد اللحظة دي.

سوسن: أنا سامعك. سامعك كويس قوي. قل لي: إنت جبت
الكلام ده منين؟! هي اللي قالتك؟! هي اللي قالت
لك تقول الكلام ده؟! ... الكلام ده مش بتاعك. إنت
ما تعرفش تقول الكلام ده لوحدك.

سليم: إوعي تستهوني بي. أنا مش محتاج حد يحط كلام
على لساني يا ست سوسن.

سوسن: ما تقلبش الترايزة على والنبي. إنت اللي من أول
لحظة ف جوازنا وانت مستهون بي.

سليم: أنا؟!

سوسن: أيوه انت. اعترف بقى. إنت عمرك ما اعتبرتني
فنانة بجد. عمرك.

سليم: بطلي الكلام ده والنبي.

سوسن: عمرك ما شجعتني ولا ساندتني.

سليم: طول عمري باشجّعك. ومن أول يوم عرفتك فيه.

إزاي تنكري ده؟! إنتي عملتي اللي عايزة تعمليه.

طول عمرك بتعملي اللي انتي عايزاه. قلتي عايزة

وقت لنفسك وعايزة حد يساعدك ف تربية العيال،

جبت لك أحسن مربية أطفال؛ أربعة وعشرين ساعة

ف اليوم.

سوسن: مربية أطفال؟! عشانى أنا؟!

سليم: قُلْتِي عَايِزَة مَكَان لِيكِي لَوْحَدِك، أَجْرْت لَك اسْتودِيو.
وَرَبُّنَا وَحْدَه اللَّي يَعْلَم كُنْتِي بِتَعْمَلِي إِيه هِنَاك. أَنَا
عُمْرِي مَا رُحْت لَك فِيه.

سوسن: كَل اللَّي أَنَا كُنْت عَايِزَاه هُو أَحْتِرَامَك لِي وَللشَّغْل
بِتَاعِي.

سليم: آه. لِّلْفَن؟! لِّلْفَن بِتَاعَك؟!!

سوسن: إِنْت مَا فِيش فَايِدَة مُمُ الْكَلَام مَعَاك. أَطْلَع مِّن هِنَا.
أَطْلَع بَرَّة. بَرَّة.

سليم: إِنْتِي اسْتَعْمَلْتِي الْجَوَاز عَشَان "الْفَن" بِتَاعَك دَه وَبَس.

سوسن: بَرَّة.

سليم: إِنْتِي عَارِفَة يَعْنِي إِيه الْوَاحِد يَشْجَعُ حَاجَة مَش مُؤْمِن
بِيهَا؟! حَاجَة مَش شَايْفَهَا أَصْلَا؟! دَه شَيْء مَمِيْت.
شَيْء مَجْهَد وَمَمَل.

سوسن: أَنَا مَا عِنْدِي شِ كَلَام تَانِي. (تَنْظُر بَعِيداً عَنْه).

سليم: وَالْأَ الْكُدْب. أَنَا طَوَّل الْوَقْت بَاكُدْب عَلَي نَفْسِي
وَعَلَيْكِي ...

سوسن: إِمْشِي مِّن هِنَا. غُور.

سليم: كَانَ الْمَفْرُوض أَصَارْحَك بِإِيه يَعْنِي؟! أَقُول لَك إِيه؟

.. أَقُول لَك إِنْ "الْفَن" بِتَاعَك دَه مَقْرَف؟! .. إِنْ

لَوْحَاتِك دِي زِبَالَة؟!!

سوسن: جَبَان.

سليم: كَانَ الْمَفْرُوض أَقُول كَذَه؟! كَانَ الْمَفْرُوض أَقُول لَك

إن الفن بتاعك ده حجة عشان ما تدوريش على شغل
زي كل البني آدمين؟!
سوسن: إنت ما عندكش إحساس.

سليم: وبعدين انتي لازم بقى تعملي حاجة مفيدة ف حياتك.
شوفي لك شغلانة والا حاجة.

سوسن: إزاي تتجراً علي كده؟! إزاي تتجراً وتقول كده؟!
سليم: ما كنتش أقدر أتجراً قبل كده طبعاً! إزاي اتجراً؟! ده

أنا كنت قاعد انفخ ف أسطورة الموهبة بتاعتك دي
عشان الدنيا تمشي. (تصفعه سوسن فجأة. يجذب
معصمها) عايزة خناقة يعني؟! .. عايزة تتخانقي؟!
هه؟! .. عايزة تضربيني؟!

(يدفعها. تبصق على وجهه.

يشتبكان بالكلمات.

يشتبكان باليد في عنف.

يقعان فوق السرير. يشتبكان عاطفياً أيضاً بنفس

الحدة).

سوسن: أنا ممكن اقتلك دلوقت. اقتلك.

سليم: وزيني شطارتك. أنا أهه. قدامك أهه. ياللا. وريني

هتقتليني إزاي.

(غضب مزدوج.

العين في العين.

يقبلها في عنف.

تقاوم لحظة قصيرة جداً ثم يستسلمان لبعضهما بينما
تخفت الإضاءة تدريجياً، ويظلم المسرح).

المشهد الثالث

(منزل مراد ومرفت ثانية، متأخراً في نفس الليلة.
حجرة المعيشة.
مرفت ومراد على الكنبة).

مرفت: سوسن وسليم!!?
مراد: أنا فعلاً مش مصدق!
مرفت: دُوناً عن كل الناس المتجوزين اللي نعرفهم ...
مراد: آخر ناس الواحد يصدّق إن ده يحصل لهم.
مرفت: يا خبر يا مراد؛ دا احنا اللي قدّمناهم لبعض.
مراد: فعلاً صحيح. أنا كنت ناسي الحكاية دي.
مرفت: (يجلسان في صمت، كل ضائع في بحر أفكاره).
تصوّر كده لو انت ف مكان سوسن؛ إحساسك يبقى
ازاي؟ بعد ما تقضي حياتك كلها مع واحد ويتضح
لك بعد كده إنه، نفس البني آدم ده، اللي حطيت كل
ثقتك فيه، وحطيت كل حياتك ف إيديه، إنه مش هو
اللي انت كنت شايفه؟ مش هو اللي كنت تتصوره؟
.. يطلع واحد تاني، واحد شبهه وخلص؛ ... تقدر
تستحمل ده؟!

مراد: إهْدِي شُوِيَّةَ يا مرفِت. اسنْتِي شُوِيَّة. إحنا لسْه مش

عارفين الحكاية إيه. مش عارفين كل الحكاية.

مرفِت: وإيه اللِّي عايِز تعرفه لسْه؟! ما هو طلع راجل

فالصو، راجل مزوّر، مضروب زِي ما بيقلوا. ده
خانها مع واحدة تانية.

مراد: ماشي ماشي. بس الحكاية مش ممكن تكون بالبساطة

دي. ما انتي عارفة يا مرفِت، عُمر الحاجات ما
كانت كده.

مرفِت: راجل تَعْبَان.

مراد: مش معقول يا حبيبتِي. إنتي بتتكلّمي عن واحد كنتي

لحد ساعتين بس بتقولي عنه إنه أحسن راجل ف
الدنيا.

مرفِت: أيوه حصل. كنت غلطانة. كنت مغشوشة فيه. أنا

مش قادرة اصدّق إني كنت عميا بالشكل ده! يا خبر
اسود. معني كده إن حُكْمِي على الناس وِحْش قوي،
مش كده؟

مراد: كفاية بقى. سليم هو هو؛ نفس البني آدم اللِّي عرفناه

طول السنين دي؛ وانتِي كنتي طول عُمرِك بتحبّيه
وتقدّريه.

مرفِت: لأ. مش هو نفس البني آدم. مش ممكن يكون هو

نفس البني آدم. أنا يتهيأ لي إنه عُمره ما كان نفس
البني آدم.

- مراد: يا سلام!!
- مرفت: يمكن عُمرنا ما عرفناه. عُمره ما كان موجود ف حياتنا من أصله.
- مراد: ياساتر يا رب.
- مرفت: يمكن احنا اللي شُفناه كده؛ .. كنا عايزين نشوفه كده؛ محتاجين نشوفه كده؛ خيالنا اللي عمله. صاحبك ده راجل كذاب؛ دخلاب.
- مراد: دلوقت بقى صاحبي لوحدي!؟
- مرفت: قدر يقنعنا إنه راجل حسّاس ومؤدّب وحبّوب، وإنه أب وزوج كويس ..
- مراد: وهو فعلاً كده. كل اللي قلتيه صح. سليم فعلاً مؤدّب وحسّاس وجدع.
- مرفت: لأ طبعاً. وبعدين أنا ما قلّتش جدع دي. جبتها منين دي!؟ من خيالك برضه!؟
- مراد: كل اللي حصل إنه غلط غلطة وخلص.
- مرفت: غلطة!؟!!!
- مراد: أيوه؛ وسليم هو سليم.
- مرفت: اللي عمله ده أكثر كثير قوي من غلطة يا مراد. أكثر كثير جداً. أنا ازاي أقدر أبص ف عينيه تاني!؟ .. بعد اللي عمله ف سوسن ده!؟ واللي عمله ف العيال!؟ .. لأ طبعاً.
- مراد: أمال عايزانا نعمل إيه يعني!؟ نتخلى عنه!؟

- نقاطعه؟! نظرده؟! ده أقرب وأقدم صحابي.
- مرفت:** أنا مش عايزاك تعمل حاجة. مش منتظرة منك حاجة. اعمل اللي انت عايزه. بس انا ما أقدرش أبص ف وشه تاني.
- مراد:** مش يمكن واقع ف ورطة والأ حاجة؟! يمكن واقع ف ورطة. ندور له ضهرنا يعني ونتخلي عنه؟! ... تبقى صحوبية إيه دي بقي؟! ... أنا متأكد إن سوسن بتعاقبه بقسوة. مش هنيجي عليه احنا كمان بقي.
- مرفت:** أمال عايزها تعمل إيه يعني؟! تدي له جائزة؟! تكافئه؟! ... دي مجروحة؛ دي ضحية.
- مراد:** يعني معنى كده إيه يا مرفت؟! معنى كده إننا لازم نقف جنبها هي بس؟! وهو نعاقبه؟! ...
- مرفت:** أنا باقول لك أنا ما أقدرش أصاحبه تاني؛ ما أقدرش. إنت حر. صاحب اللي عايز تصاحبه يا أخي. أنا، بالنسبة لي، البني آدم اللي يعمل كده لا يمكن أثق فيه، مش أهل ثقة.
- مراد:** إنتي قاسية جداً.
- مرفت:** أنا مش قاسية. أنا مش قاسية يا مراد. والكلمة دي من الكلمات اللي ...
- مراد:** طيب طيب. خلاص. متأسف.
- مرفت:** أنا مش قاسية. أنا باحافظ غ المبادئ. ما تقدرش تلومني عشان عايزة أحافظ غ المبادئ.

- مراد: والتفهّم والعفو والمغفرة مش مبادئ برضه!!؟
- مرفت: فيه حاجات لا يمكن التسامح فيها.
- مراد: يا ساتر.
- مرفت: (تكمل). الموضوع بسيط جداً، مش عايز تفلسف: لكل فعل رد فعل؛ واللي يعمل حاجة لازم يتحمل عواقبها.
- مراد: طَبُّ والنبي إِبْقِي اِكْتَبِي لي لِسْتَةَ بالحاجات اللّٰي ما تقدريش تسامحي فيها، عشان ما اعملهاش أبداً.
- مرفت: إِنْتِ لو عملت حاجة مِ النوع دَه، أنا باقول لك اهه، تاخذ بعضك وتمشي من سُكّات؛ تاخذ بعضك وتتسحّب على برّة.
- مراد: والله!!؟
- مرفت: والله. وما تفتكرش إني حتى ممكن اسمح لك تبات ف الصالة زِي ما هي عملت.
- مراد: طَبُّ عشان العيال بَسْ.
- مرفت: نعم!! العيال!! إِنْتِ كمان عملت حاجة والأ إيه!!؟
- مراد: أنا باتكلم عليها. هي سمحت له بكده عشان العيال. أنا أقدر اتعاطف معاها ف النقطة دي.
- مرفت: الراجل اللّٰي يمزّع أسرته كده ما يستحقّش ينام معاها تحت سقف واحد. أنا متأسفة. مش هاسمح بكده.
- مراد: طَبُّ والعيال!! ما هو له فيهم برضه. دُول عياله هو كمان، وله حق فيهم.

- مرفت: هو اتخلّى عن الحق دَه؛ فقد حقوقه.
- مراد: لأ، إنتي قاسية فعلاً.
- مرفت: أنا قلت لك الكلمة دي ما باحبهاش. وبعدين ما تبقاش سطحي بقى. كل واحد لازم يدفع تمن اللي بيعمله. الموقف المايح بتاعها دَه ما يمشيش معايا. أنا مش عارفة هي ازاي قادرة تستحمل دَه؟! ... لو أنا مكانها كنت رميته برّة من يومها، ومن غير شنطة هدومه.
- مراد: يعني معنى كدَه إني لو ف لحظة ضعف كدَه غلطت مع واحدة ف فندق مثلاً والأ حاجة، وكنت عبيط واعترفت لك، هنتصرفي كدَه برضه؟! تقولي لي اطلع برّة؟! طبعاً.
- مرفت: مراد: ولا حتى نقدر نتكلم ولا نتصاحب؟! مرفت: لأ طبعاً. لا يمكن. إنت بتهزّر والأ إيه؟! مستحيل. مراد: ولا حتى نقدر نتصرف باحترام مع بعض؟! ولا حتى عشان العيال؟! (مرفت تفرد ذراعيها وترفع حواجبها كأنها تتعجب من جنون سؤاله. مراد يكمل:) أنا دلوقت بس فهمتك. دلوقت عرفت إنتي بتفكري ازاي.
- مرفت: كويس. أحسن لك برضه. (تجذبه إليها. يريح رأسه فوق فخذيها).

مراد: المشكلة يا مرفت إن الواحد ما يقدرش يعرف اللي بين اتنين متجوزين أبداً. لا يمكن تقدرني تعرفي. علاقة الجواز دي سر كبير؛ غموض.

مرفت:

مراد:

مرفت: وهنعمل إيه من غيرهم ف أجازات الصيف؟!!

مراد: يا خبر اسود. هنعمل إيه من غيرهم صحيح؟! مش ممكن نعزم سوسن والعيال أسبوع مثلاً، وبعدين نقول لهم رَوِّحُوا بَقَى ونعزم سليم بعدهم؟!!

مرفت: طبعاً لأ. ما ينفعش.

مراد: تبقى شكلها وحش قوي.

مرفت: لخبطة جامدة.

مراد: أنا حاسس كأن حد مات.

مرفت: (تهز رأسها موافقة) ...، ... بس إنت كنت ساكت ليه النهار ده؟!!

مراد: ...

مرفت: ... لما سوسن كانت بتحكي لنا اللي حصل، إنت كنت ساكت خالص؛ ما نطقتش كلمة.

مراد: ما كنتش ساكت ولا حاجة. أنا كنت ف صدمة.

مرفت: سببتي اتكلم لوحدي طول الوقت.

مراد: وإيه الغريب ف كده؟! ما انتي طول عمرك تتكلمي وأنا أسمع.

- مرفت: (تلكمه فجأة). يا غلس.
- مراد: صحيح والله، إنتي دايماً كده؛ دايماً عندك كلام تقوليه أكثر مني. ف أي موضوع تلاقي عندك كلام. بتجيبني كل الكلام ده منين يا مرفت؟! مرفت: ما تتهرَّبش.
- مراد: أتهرَّب من إيه؟! مرفت: أنا يتهيأ لي إن اللي سوسن قالته كان صعب عليك قوي.
- مراد: طبعاً كان صعب. ما فيش حد يحب يسمع عن أعز أصحابه اللي اتقال ده.
- مرفت: لأ، مش ده قصدي. بطلت تتهرَّب م الكلام يا مراد.
- مراد: أمال قصدك إيه؟! مرفت: قصدي إن الكلام عن الجواز وكده، ... الموضوع كان قريب منا خالص، يتهيأ لي إن ده عمل لك قلق.
- مراد: قلق؟! مرفت: أيوه.
- مراد: طيب، ماشي، أنا كنت قلقان. أصل الموضوع ما يبسطش قوي يعني.
- مرفت: ما تعملش نفسك غبي يا مراد.
- مراد: نعم؟! مرفت: ما تعملش نفسك مش فاهم يا مراد.

- مراد: (يبتعد عنها جالساً). والله ما فاهم!
- مرفت: لأ فاهم. إنت فاهم. وكل مرّة اعوزك تتكلم معايا ف موضوع زي ده تعمل كده برضه.
- مراد: إنتي بتجرّي شكل و الأ إيه؟!
- مرفت: لأ يا مراد مش جرّ شكل.
- مراد: إنتي عايزة إيه يا مرفت؟! عايزاني أقول إيه؟!
- عايزاني أقول لك إني كنت خايف ومرعوب؟!
- عايزاني أقول لك كده؟!
- مرفت: أيوه.
- مراد: طبّ خلاص يا ستي. كنت مرعوب. خلاص؟!
- إستريحتي؟!
- مرفت: أنا كمان اترعبت يا مراد. كنت ميّنة م الرعب. أصل الواحد يا مراد يبقى فاكر إنه بعيد عن الحاجات دي، بعيد عن اللي حصل ده، وإنه واقف علي أرض صلبة؛ وفجأة تلاقي الأرض دمدمت وانشقت من تحت رجلك.
- (ضوء سيارة يسطع من خلال نافذة الصلاة. صوت ماكينة عربية تدور؛ ثم تتوقف).
- مراد: (ينظر من خلال النافذة). مين اللي جاي لنا الساعة دي؟! يا ليلة مش فايّنة! مش هتصدّقي. ده سليم.
- مرفت: بلاش هزار!
- مراد: سليم والله!

- مرفت: المفروض إنه مسافر!
- مراد: الظاهر ما سافرش.
- مرفت: (تهم بمغادرة المكان.) أنا مش عايزة اشوفه. قل له
إني دخلت انام.
- مراد: مرفت!! إيه اللي بتعمليه ده؟! ما يصحش كده.
- مرفت: أولاً أنا قلت لك مش عايزة أبص ف خلقته، وثانياً
هو جاي عشانك انت، مش عشاني. هو صاحبك
انت.
- مراد: إيه اللي بتقوليه ده؟! ما انتي طول عمرك بتحبي
سليم وبتعتبريه صاحب ليكي برضه.
- مرفت: لأ، دي كانت أو هام.
(صوت طرقات على الباب.)
- مراد: مرفت! ... لو سمحتي! (طرقات خفيفة أخرى.) ما
تسيبينيش أقعد معاه لوحدي. (مرفت تلين قليلاً. مراد
يسرع إلى الباب ويفتحة.) ... سليم؟! إزيك؟
- سليم: مساء الخير يا مراد. متأسف. أنا عارف إني
مجنون. متأسف.
- مراد: لا ما فيش حاجة. البيت بيتك. أدخل.
- سليم: بس أنا كان لازم اشوفكم النهار ده.
(مراد يهز رأسه متفهماً. سليم يحتضنه.)
- مراد: أنا عارف، عارف.
- سليم: أنا وقعت ف خيئة تانية يا مراد ...

- مراد: أنا يتهيأ لي إن ...
- سليم: (يلمح مرفت.) مساء الخير يا مرفت. (يتقدم منها متوقفاً كالمعتاد سلاماً حاراً. لغة جسدها تقول لا).
- سليم: إيه يا مرفت؟! ... يتهيأ لي إنك ممكن تسلمي عليّ برضه! ... اللي عندي ده مش مرض مُعدي ولا حاجة. (صمت. تسقط مرفت دروعها وتترك له يدها. يسلم عليها).
- مرفت: سوسن قالت لنا إنك ف أسكندرية!
- سليم: كان المفروض كده، بس ما قدرتش أروح. الجو وحش قوي.
- مراد: فعلاً الجو وحش جداً. السواقة ف الجو ده خطر.
- سليم: أنا ما كانش يصح أطب عليكم كده؛ كان لازم على الأقل أكلّمكم ف التليفون الأول. متأسف جداً يا مرفت.
- مرفت: مش أنا اللي المفروض تتأسف لها يا سليم. (لحظة ارتباك).
- مراد: (لسليم) اتعشيت والّا لأ؟
- سليم: الحقيقة لأ. أنا ما أكلتس حاجة من ساعة الضهر.
- مراد: أنا هاسخن لك حاجة.
- (مرفت ترمق مراد بنظرة غضب ولوم).
- سليم: لا لأ، ما تتعيش نفسك.
- مراد: أتعب نفسي ده إيه؟! دي مش هتاخذ دقيقة!

- سليم: أصل الوقت متأخر قوي ويعني ...
- مرفت: سليم عنده حق. الوقت فعلاً متأخر.
- مراد: (لسليم.) ما تقلقش؛ مش هتاخذ دقيقة واحدة. هاعمل لك حاجة سريعة. (يذهب إلى المطبخ.)
- سليم: متشكر يا مراد. (صمت. ثم ينادي:) مراد، وما عندكش حنة من كنافة اللمون؟
- مراد: لأ عندنا طبعاً.
- سليم: أنا حظي دايماً كويس.
- مرفت: هي قالت لك غ الكنافة؟؟!!
- سليم: قالت لي انها جميلة.
- مرفت: إنتوا اتكلمتوا غ الكنافة؟؟!!
- سليم: أيوه؟ وليه لأ؟! إتكلّمنا ... (مراد يعود.)
- مرفت: طيّب بقى. إنتوا الاتنين ااعدوا ودودوا مع بعض بقى. أنا رايحة انام.
- سليم: مرفت؛ إستني لحظة. (تتوقف.) ... بُصّي يا مرفت، أنا عارف إن الموضوع ذه غريب شويّة ...
- مرفت: لا لأ، مش غريب ولا حاجة.
- سليم: الموضوع أكبر من إنه يتهضم ف مرة واحدة يا مرفت. أنا عارف؛ إنتي زعلانة مني؛ وذه مفهوم ...
- مرفت: أنا مش زعلانة.

سليم: هو ده بالظبط الليّ أنا كنت خايف إنه يحصل. أنا

كنت خايف انكم تحكموا عليّ من غير ما تسمعوني.

مراد: مش صحيح يا سليم، ما حدش حكم عليك ولا حاجة.

مرفت: أنا تعبانة ورايحة أنام. تصبحوا على خير.

سليم: أنا كنت عامل ترتيبات مع سوسن إننا نقول لكم

الموضوع سوا. بس أنا كنت حاسس إن سوسن

هتعمل كده وهتيجي تقول لكم لو حدها. هي كمان

كانت عاملة ترتيباتها. التصرف اللي عملته ده مش

كويس؛ تصرف انتقامي؛ تصرف وحش بصحيح.

أنا مش مستعدة اتكلم معاك ف الموضوع ده دلوقت.

مرفت: إنت طبييت علينا من غير ميعاد ...

مراد: مرفت!

سليم: أنا اعتذرت لك يا مرفت. أنا ما كنتش عايز الليلة

دي تعدي من غير ما اتكلم معاكم.

مرفت: تصبح على خير.

سليم: ايه يا مرفت ده؟! ايه اللي بتعمليه ده؟! مش عايزة

حتى تسمعي وجهة نظري؟! (نتوقف) أنا جيت لكم

لحد هنا ... قصدي إنه فعلاً يا مرفت ... من حقّي

عليكي يا مرفت إنك تسمعيني برضه. من حق

العشرة عليكي إنك تسمعيني. إنتم غالين عليّ

لدرجة....

مراد: سليم عنده حق.

مرفت: طيّب يا سليم، أنا أهه. إقنعني يا سيدي بقي. اعمل لي غسيل مخ. إنت جاي سايق ف المطر ده، ف نص الليل، بسُ عشان تبرر موقفك؛ وعشان عايزنا نوافقك ونقف جنبك. إنت كل اللي ف دماغك إنك تحقق اللي ف دماغك وخلص.

سليم: أنا مش عايز حد يقف جنبي ف أي حاجة. أنا بسُ عايز حقي. وحقي عليكم إنكم تسمعوني. إنتوا سمعتم الحكاية من طرف واحد، وده مش عدل.

مرفت: الموضوع ما فيهوش لبس يا سليم، صح؟

سليم: لأ ما فيهوش. أنا مش مفتري يا سوسن. بسُ ممكن أحكي لك حاجات عن سوسن

مرفت: يا ساتر عليك يا أخي. الظاهر إن سفالتك ما لهاش حدود.

مراد: مرفت!!

سليم: قصدي إنني ممكن أقول لك حاجات تشرح لك الموضوع أكثر شوية. هي سوسن ما حكيت لكيش عن إننا حتى ما بنلمسش بعض خالص؟

مرفت: مش عايزة أسمع الحاجات دي لو سمحت.

سليم: ما قالت لكيش إنها بطلت تلمسني؟

مرفت: مش عايزة أسمع الكلام ده خالص.

سليم: طيّب يا مرفت. خلاص. إذا كنتي مش عايزة تسمعيني؛ إذا كنتي عايزة تفضلي غضبانة

- وتقاطعيني؛ إنتي حرّة. زي ما انتي عايزة.
 مرفت: اللّي إنت عملته ده حاجة حقيرة. واحدة بتاعة
 فنادق؟! فنادق يا سليم!
 مراد: مرفت!
 سليم: إيه؟! هي قالت لكم كده؟! سوسن قالت كده؟!
 مرفت: (تكمل) مش كان ممكن تختار أحسن من كده؟!
 سليم: (يكمل) لبنى ما بتشتغلش ف فندق. لبنى مديرة
 العلاقات العامة بتاعة الشركة.
 مرفت: أنا ما يفرقش معايا هي بتشتغل إيه ولا فين. اللّي
 يفرق معايا إنك عملت معاها علاقة.
 مراد: (منزعجاً) إيه ده؟! إيه ده يا مرفت?!
 سليم: (لمرفت) طبّ وانتي إيه بقى اللّي مزعلك؟! (لمراد)
 دي بتتصرف كأني ... (مراد يهز أكتافه)
 مرفت: أي راجل يعمل اللّي انت عملته ...
 سليم: إنتي فاكرة إن ده كان موضوع سهل علي؟! إنتي
 فاكرة كده يا مرفت؟! هي دي فكرتك عني؟
 مرفت: أنا ما اعرفش فكرتي عنك إيه. أنا فعلاً ما اعرفش.
 مراد: مرفت!!
 مرفت: كل اللّي اعرفه إنك فعلاً تستحق واحدة زي اللّي
 معاك دي.
 سليم: بصّي يا مرفت، أنا يتهيأ لي إنك تزوحي تنامي

- أحسن.
- مرفت: عندك حق. تصبحوا على خير انت وهو. (تخرج. صمت).
- مراد: انت وهو؟! يا ساتر.
- سليم: أنا كنت عارف انها مش هتعدّي الموضوع على خير.
- مراد: أصبر عليها شوية يا أخي؛ الموضوع لسه سخن. (سليم يوافق. يجلس ليأكل) تحب اسخن لك الأكل تاني؟
- سليم: لأ. كده كويس.
- مراد: أجيب لك حاجة تشربها؟
- سليم: لو عندك حاجة ساقعة. والأ أقول لك، بلاش. أصل أنا عامل ريجيم.
- مراد: ريجيم ايه يا سليم، ده انت تستخبي ورا فتلة.
- سليم: أنا متشكر على موقفك يا مراد. أنا كنت عايزك تعرف مني الأول. الأيام اللي فانت دي كانت صعبة علي قوي. كنت حاسس زي ما اكون يتيم، مقطوع من شجرة.
- مراد: مفهوم.
- سليم: أنام ف الصالة، وماشي بشنطة هدومي ف العربية. (يتذوق اللحم) .. الله. عاملها ازاي دي؟
- مراد: سهلة جداً. أهم حاجة إنك تتفع اللحم ف البصل م

اللَّيْلَةَ الَّتِي قَبْلَهَا...

سليم: فعلاً؟!

مراد: وبعدين قبل ما تعملها، تدعكها ف زيت زيتون

ولمون وتوم ... تسيبها نص ساعة كده، وبعدين

تخطها ف الفرن؛ وتقلبها كل شويّة. وما تنساش

تدفي الفرن الأول.

سليم: تحفة.

مراد: بالهنا والشفاء. (يراقب سليم وهو يأكل) سوسن خايفة

عليك. خايفة بييجي لك انهيار عصبي.

سليم: طبعاً هي فاكرة كده. أمال كنت عايزها تفتكر إيه

يعني؟! أحسن لها تفتكر كده. لو انت كنت مكان

سوسن كنت هتفكر كده طبعاً. أنا ما اتجننتش

يا مراد. لا انهيار عصبي ولا يحزنون. أنا حاسس

إني ف أحسن حالاتي؛ أحسن من أي وقت ف

حياتي.

مراد: لو كنت وثقت في أكثر يا سليم وأخذت رأيي، ...

سليم: مراد!

مراد: بجد والله. قل لي إنت بتفكر ازاي. أنا عايز أفهم؛

عايز موقفي يكون معتدل وموضوعي.

سليم: نعم؟! إنت عايز تلعب ف دماغي وتخليني ارجع ف

رأيي.

مراد: طبعاً. مضبوط. عايزك تعقل.

سليم: طَبِّ إِفْرَضْ إِنْ أَنَا مَشْ عَايِزْ أَعْقَلْ؟ ...، مَا أَنَا
طَوَّلْ عَمْرِي عَاقِلْ يَا مَرَادْ؛ إِيهَ اللَّيْ أَخْدِنَاهُ مَ الْعَقْلُ
بَقِي؟!

مراد: أَنَا كَانَ مَمَكْنِ أَوْفَرَّ عَلَيْكَ الْمَشَاكِلِ وَاللَّخْبَطَةَ دِي.
سليم: شُفْتِ بَقِي. إِنْتِ مَقْتَنَعْ إِنْ الْمَوْضُوعِ مَجْرَدْ لَخْبَطَةَ.
إِنْتِ مَ الْأَوَّلْ حَاطَطْ حُكْمَكْ عِ الْمَوْضُوعِ. كُنْتِ
عَايِزْنِي أَسْتَشِيرُكَ إِزَّايْ وَإِنْتِ عِنْدَكَ أَحْكَامْ مَسْبِقَةَ
زَيْ دِي؟! أَنَا شَايْفْ إِنْ اللَّيْ حَصَلَ مَشْ لَخْبَطَةَ وَلَا
حَاجَةَ. اللَّيْ حَصَلَ دِهْ هُوَ أَحْسَنْ حَاجَةَ حَصَلْتِ لِي
فَ حَيَاتِي.

مراد: إِيهَ الْمَوْضُوعِ يَا سَلِيمْ؟! إِيهَ الْمَوْضُوعِ؟! ... جِنْسْ
وَبَسْ، وَالْأَفِيهْ إِيهْ؟!!

سليم: جِنْسْ وَبَسْ؟!!! .. لَا مَشْ جِنْسْ وَبَسْ يَا مَرَادْ. مَشْ
جِنْسْ وَبَسْ. طَبْعاً الْجِنْسْ جِزْءْ مَهْمْ فَ الْمَوْضُوعِ.
مَا أَنْتِ عَارِفْ يَا مَرَادْ. إِنْتِ عَارِفْ. أَنَا ...؛ الْجِنْسْ
أَخِيراً بَقِي حَاجَةَ جَمِيلَةَ.

مراد: يَعْنِي فِيهِ جِنْسْ بَيْنَكَ وَبَيْنَ السَّتْ دِي؟!!!

سليم: لِأَطْبَعاً.

مراد: أَمَّا قَصْدُكَ إِيهْ؟! يَكُونُشْ قَصْدُكَ بَيْنَكَ إِنْتِ
وَسَوْسِنْ؟! إِنْتَوَا لَسَّهْ فِيهِ بَيْنَكُمْ جِنْسْ؟!!

سليم: أَيُوهِ. وَلِيهِ لِأَ؟!!!

مراد: مَشْ عَارِفْ. أَنَا يَتَهَيَّأْ لِي فَ الْظُرُوفِ اللَّيْ بَتَحْكُوا

عنها دي؛ كمية الكراهية والغضب ده ...؛ أنا
مش فاهم ازاي الجنس يتولد ف الظروف دي؟!
سليم: ده الجنس بقى جميل وحرّاق جداً. يا ريت العلاقة
كانت كده لما كنا مع بعض.

مراد: أنا الظاهر بقيت دقة قديمة. أنا كنت فاكّر إن الجنس
الحلو هو نتيجة مباشرة للحب والثقة والاحترام
المتبادل.

سليم: إنت بتهزّر؟! إنت فعلاً بتهزّر، مش كده؟! إوعى
يا مراد تقلل من قيمة الغضب. الغضب ممكن يشعل
الحب والجنس.

مراد: نعم يا اخويا؟!
سليم: (يتذوّق الكنافة) حلوة جداً.

مراد: فعلاً؟! على فكرة النوع ده مش بيتخّن؛ ... يعني
انتوا لسّه بتتاموا مع بعض، صح؟

سليم: بس أنا مش هاسميه حب. الحقيقة سوسن رافضة
تلمسني خالص.

مراد: قصدك إيه؟!
سليم: يعني ما فيش لمسات ولا عواطف بتاعة واحدة

بتحب؛ واحدة تمسك إيدك؛ تحط دراعها ف دراعك
وانتوا ماشيين؛ تحط إيدها على كتفك، ... وكده
يعني. ده ما فيش. (صمت) أنا عملت لها اختبار
الشهر اللي فات. قلت لنفسى إني مش هالمسها

خالص، واشوف هي هتستحمل قد ايه قبل ما
تلمسني. أنا مش باتكلم غ الجنس دلوقت. أنا باتكلم
عن القلامس؛ عن بوسة تصبح على خير، عن
طبطبة ولمسة إيد. ما قربتش مني نهائي يا مراد.
أسبوع بحاله. أنا ما قدرتش أستحمل طبعاً. عيظت
والله يا مراد. عيظت.

مراد: يا ساتر!!

أنا ما اعرفش إنتم عاملين ايه، إنت ومرفت يعني؛
ومش عايز أعرف. بس أنا دلوقت، ف العمر ده، ف
اللحظة دي من حياتي، عايز أستمتع. أنا مش عايز
اكمل حياتي كده. مش عايز أعيش طول عمري
أشحت من مراتي رضاها عني. فاهم؟ ... مش
ممكن يا مراد إنك ترُوح السرير و ف بالك شوية
جنس وتبدأ تتكلم مع مراتك عادي كده، وتقول حاجة
خايبة جات على بالك، ترُوح مراتك مكشرة وتلوي
بوزها وتقلب الدنيا عليك حريقة. أنا يتهايا لي يا مراد
إن أنا أكثر راجل متجوز ف العالم كان بيمارس
العادة السرية.

مراد: لأ ما اعتقدش. وبالمناسبة بقى، مين قال لك إن

الجواز هو جنس أربعة وعشرين ساعة ف اليوم؟!
مين قال لك كده؟!

سليم: أنا مش عايز أربعة وعشرين ساعة ف اليوم، ولا

حتى ساعة ف اليوم، ولا حتى كل يوم. أنا عايز
عواطف يا مراد. عواطف.

مراد: (يطرق في صمت) وفي الفترة اللي فاتت دي،
عرفت ستات؟

سليم: (في ضيق) لأ.

مراد: متأسف.

سليم: لا يا مراد. ما عرفتش حد. بس طبعا كان فيه

فرص؛ فرص كثير كمان. لما يكون الواحد بيسافر
كثير، وبينزل ف فنادق كثير، وبياكل ف المطاعم
لوحده، ساعات بيقابل ستات. ستات كنت تعرفهم
زمان، أو قابلتهم زمان؛ وتتكلم معاهم، ونضحك
شوية. ساعتها الواحد بيحس إنه لسه راجل مرغوب
فيه. وساعات أقول لنفسى: ياه، ما انا لسه حلو اهه،
والستات ممكن يعجبوا بي. وأحس الجاذبية
والكهربا ف الهوا كده بيني وبين الست اللي قاعد
معاهها. فاكر الزنة يا مراد؟ فاكر كلمتك دي؟ حاجة
تزن كده جوه دماغك وتقول لك إن الست دي
عايزاك. فاكر؟ أنا أول ما كانت الزنة دي تيجي

يا مراد كنت أخاف، وأتحجج بأي حجة وأمشي.
أقول لها تصبحي على خير وأجري غ الأوضة
بتاعتى؛ وأروح عامل تليفون لسوسن. كنت أتصل
بيها على طول من كتر الإحساس بالذنب، أو

الرغبة، أو الاتنين. وخذُ عندك بقى: أسمع كل اللوم
والتوبيخ: إنت نسيت تعمل كذا، إنت ليه عملت كذا
وما عملتش كيت.

مراد

...

سليم:

لمَّا قابلت لبني يا مراد الموضوع اختلف. لبني
خليتني أحس بالثقة ف نفسي؛ .. أحب نفسي. من
أول مرة كلمتها ف التليفون حسيت كده. ما كنتش
لسه شفتها خالص. كانت بتحجز لي تذاكر السفر
والفندق.

مراد: إنت كنت تعرفها قبل كده بقى!

سليم:

لها ضحكة جميلة، ودمها خفيف بجد. وقالت لي
"إحنا بنتكلم ف التليفون كثير، من زمان، ولسه ما
شفتناش بعض. أنا نفسي أشوفك". بس. بداية الحكاية
كده. أنا قلت لنفسي: ليه لأ؟! هو انا عامل ف نفسي
كده ليه؟! أنا محافظ على نفسي لمين يعني؟! للست
اللي قاعدة ف البيت ما لهاش شغلانة إلا العكننة
علي وتسميم جيتي؟! ما لهاش شغلانة إلا نقرزتي
رايح جاي؟! اللي كل ما أبص ف عينيها أشوف فيهم
خيبة الأمل في؟! أشوفها وهي بتقول لنفسها: يا
حظي المقنديل وبختي المايل؟! كنت أعمل إيه؟! ..
وف الناحية الثانية لقيت واحدة مرحة، لطيفة، تتمنى
إنني أخرج معاها ولو مرة واحدة. واحدة شايفاني

كويس، وحاسئة بي. أعمل إيه يعني؟! أروح هنا والّا هنا؟! ... لو انت مكاني، بزمّتك يامراد، لو انت مكاني كنت تختار مين؟

(صمت)

مراد: طبّ وبعدين يا سليم؟!

سليم: بعدين إيه؟!

مراد: هاتعمل إيه يعني؟!

سليم: أعمل إيه ف إيه يا مراد؟!

مراد: يعني إيه يا سليم؟! عايز تهذّ حياتك وحياة أسرّتك

كده؟! بالبساطة دي؟! إنت مش ناوي تروح تشوف

دكتور نفساني والّا معالج نفسي والّا حاجة؟! دلوقت

فيه متخصصين ف المشاكل الزوجية والمشاكل اللي

م النوع ده يا سليم. ما تروح يا أخي وتتكلم مع حد

من دول.

سليم: إيه يا اخويا؟! دكتور والّا أخصائي؟! إنت بتقول إيه

يا مراد؟!!!

مراد: ليه لا يا سليم؟! إحنا بنتكلم عن أسرة بحالها يا أخي؛

مش عنك لوحديك؛ مش عن احتياجاتك وإحباطاتك

لوحديك. دي أسرة يا سليم، أسرة. إنت ومراتك

وعيالك.

سليم: الجواز دي انتهت خلاص يا مراد.

مراد: إيه اللي عرفك إنها انتهت؟!

سليم: أنا عارف انها انتهت. أنا عايزها تكون انتهت.
الجوازة دي خلصت، خلصت من زمان، من زمان
قوي.

مراد: صحيح؟! هو ده قرارك؟! قادر تقرر وسط المعمة
دي يا سليم!!! مش حتى تحاول يا أخي! مش يمكن
قرارك ده غلط؟

سليم: قراري صح. مية ف المية صح. إنت بتشك ف
قراري كمان؟

مراد: الحقيقة ...

سليم: إنت شاكك ف قراري يا مراد!!!

مراد: مش قصدي. قصدي يعني لو أنا كنت ف مكانك ...

سليم: إنت مش ف مكاني يا مراد.

مراد: (يتراجع) طيب. (صمت) أنا كل اللي كنت عايز

اقوله يا سليم إني لو كنت ف مكانك كنت هابقي
عايز اتأكد الأول إن الجوازة دي ما فيهاش أمل
خلاص. وعشان نتأكد ...

سليم: (غاضباً ومستفزاً) يا ساتر عليك يا مراد.

مراد: إزاي بس تمشي كده يا سليم؟! إزاي تسبب عيالك

ومراتك كده؟! أنا مش قادر أفهم إنت جبت القوة دي
منين؟! ... كدهه؟! بالبساطة دي؟! نقول كلمتين،

وتمشي تطوح إيديك ورجليك وخلص كده؟! سلام

يا جماعة؟! ... إزاي كده يا سليم؟ إزاي بس؟!؟!!

- سليم: يا الله عليك يا مراد.
- مراد: دُول اتناشر سنة! مش شايف إنك عليك واجبات ناحية عيالك ومراتك؟!!
- سليم: أنا قعدت السنين دي كلها غصب عني، وعشان العيال. كفاية بقى. أنا قعادي علشانهم ما بقى لهوش أي معني. بالعكس؛ قعادي معاهم كده ضرر ليهم. العلاقة بيني وبين سوسن علاقة مضرّة ليهم كده.
- مراد: طَبِّ ولو طلّع الموضوع فاشوش؟! لا حب ولا حاجة؛ بس مجرد نزوة عابرة، تعمل إيه ساعتها؟!!
- سليم: نزوة إيه وبتاع إيه؟! إيه الكلام اللي بتقوله ده؟!!
- مراد: مش ممكن يكون "مراهقة متأخرة" زي ما بيقولوا؟!!
- سليم: إيه يا مراد الكلام ده؟! وبعدين ما كل حاجة ممكن يا أخي. أعمل أنا إيه بقى؟! أفضل عايش ف الهباب اللي أنا فيه ده عشان يمكن وما يمكنش؟!!
- مراد: مش غ الأقل تحاول قبل ما تخرب الدنيا كده؟
- سليم: كلامك وحش يا مراد. مش ده الكلام اللي كنت عايز أسمعك منك خالص. مش هو ده الكلام. إنت لو كنت صاحبي بجد ...
- مراد: أنا طبعا صاحبك يا حمار.
- سليم: لو كنت صاحبي بجد كنت سمعتني أحسن من كده.
- مراد: أنا سمعتك كويس قوي يا سليم. والآن أنت قصدك إنك عايزني أسمعك بس، وما اتكلمش خالص؟!!

سليم: أيوه. هو كده.
مراد: هو كده يعني إيه؟! مش عايزني اتكلم؟! هو ده اللي إنت عايزه؟!!

سليم: بالظبط. أنا مش محتاج نصايح. مش محتاج نصايحك. مش عايز أعرف إنت بتفكر ازاي. مش عايز أعرف آراءك. أنا عايزك تسمعني بس يا أخي. كثير عليّ ده؟!!

مراد: لأ مش كثير. بس إنت برضه لازم تسمعني؛ لازم تعرف إنك رميت علينا كلنا قنبلة. رميت علينا قنبلة وكمان مش عايز تسمعنا واحنا بنصرخ. لازم طبعاً يكون لنا رأي وأحكام، أمال إيه يعني؟!!

سليم: فعلاً كده؟! طيب. أنا مش عايز أسمع رأيكم ولا أحكامكم دي بقي. خالص. أنا خلاص زهقت من "كان لازم تعمل كذا، وما كانش لازم تعمل كذا". أنا زهقت. طهقت. أنا فكرت ف الكلام ده ميت مرّة. ألف مرّة. يمكن الموضوع ده جديد عليك، يمكن الكلام ده جديد على ودانك؛ بس أنا بقي عايش فيه بقي لي كثير. أنا خلاص قررت. أنا اللي عايزه إنك بس تسمعني. تسمع وبس.

مراد: ماشي يا سليم. اتكلم. اتفضل اتكلم. مش هافتح بقي.

سليم: (بهدوء) لأ. خلاص؛ ... مش مهم.

مراد: ما تتكلم يا سليم. أنا باسمك أهه. قفلت بقي خالص،

بالضَبَّةَ والمفتاح. تاخذ المفتاح معاك كمان يا أخي!
خذ المفتاح كمان. (يلقي بمفاتيح سليم على الأرض،
ويسد فمه بكفه في غضب)

(صمت)

سليم: (سليم يلتقط المفاتيح من على الأرض)
أنا أتمنى من ربنا إنك ما تشوفش الوحدة اللي أنا
شفتها؛ وما تمرش باللي أنا مرّيت بيه. (يقف) ربنا
ما يورّيك اللي أنا شفته. (ياخذ جاكته ويبدأ في
مغادرة المكان)

مراد: سليم. ما تمشيش دلوقت. ما تمشيش كده. بشرفي
مش هاتكلم. أنا فعلاً عايز أسمعك.

سليم: (يربت على ذراعه) شكراً غ العشا.

مراد: سليم!!

سليم: أشوف وشك بخير.

(يخرج. نسمع صوت محرك السيارة يغادر المكان.

سليم يطفئ الأباجورة ويجلس وحيداً في صمت.

يفكر في عمق،

في ظلمة تامة تقريباً.

ضوء يأتي من الداخل)

مرفت: مراد.

مراد: نعم.

مرفت: حصل إيه؟ الكلام مشي ازاي؟

-
- مراد: كويس .
مرفت: تعال بقى . الوقت اتأخر . ياللا ادخل السرير وتعال
احكي لي .
مراد: دقيقة واحدة .
(ينظر حوله إلى الحجرة التي أصبحت فجأة غريبة
عنه، موحشة، وباردة جداً)
مرفت: مراد . مرمر .
مراد: أنا جاي أهه .
(مراد يبقى في مكانه . تخفت الإضاءة ويظلم
المسرح)

الفصل الثاني

المشهد الأول

(منزل مراد ومرفت القديم بالإسكندرية.
في الخلفية نسمع مقدمة برنامج إذاعي قديم.
تضاء خشبة المسرح، وتظهر صالة منزل.
محتويات المكان لا بد أن توحى بفارق الزمن، اثنا
عشر عاماً قبل بداية الفصل الأول. ويجب أن يوحى
الأثاث ومحتويات الشقة بأن المنزل لزوجين حديثين،
في بداية الحياة.

يبدو أن حجرة المعيشة (الصالة) تستخدم في
أغراض عديدة مثل القراءة ومشاهدة التلفزيون
وسماع الموسيقى، وتناول الطعام، واستقبال
الضيوف أيضاً.

الوقت قبل الغروب بقليل.

مرفت تعد عشاء في المطبخ الصغير المفتوح على
الصالة.

يدخل مراد قادماً من خارج الشقة، وبيده أكياس
مشتريات بقالة وفاكهة وبقاكة من الزهور.
تبدو كل الشخصيات أصغر سناً، وأغزر شعراً
وأكثر حماقة)

- كانت تنزل ترووح على طول.
- مراد: والنبى بلاش كلام فارغ. دي تلاقيها ميّنة غ الجواز.
 إنتي عمّالة تعززيها وتغلي ف سعرها كده ليه؟!
 مرفت: طبعاً. أعز أصحابي.
 مراد: طبّ ما هو سليم أعز أصحابي برضه.
 مرفت: بسّ إنت ندل. مش بتدافع عنه.
 مراد: والأ اللوحات اللي بترسمها دي؛ يا حفيظ.
 مرفت: يا كذاب. إنت حتى عمرك ما شفت ولا لوحة واحدة
 من بتوعها.
 مراد: طبّ هي عمرها فرجتني حاجة أبدأ. دي الظاهر
 بترسم لوحات سرّية.
 مرفت: ما لناش دعوة لا باللوحات ولا بغيره. إحنا كل اللي
 علينا إننا نعرفهم ببعض وخلص. الباقي بتاع ربنا
 بقى؛ قسمة ونصيب.
 مراد: إنت هتسكتي يا مرفت والأ لأ.
 مرفت: مش ساكتة.
 مراد: (يهددها) مرفت. أبو رجل مسلوخة.
 مرفت: لأ يا مراد، لا والنبى، ماتعملش كده، لأالأ.
 مراد: (متداخلاً مع "أ لأ لأ"، مراد يصطنع حولاً بعينيه،
 ويلوي وجهه وشفتيه، ويقلص ذراعيه، ويعرج
 بساقيه بطريقة كوميدية للغاية) عااااااوووو،
 عااااااوووو (إلا أن مرفت تخاف فعلاً كطفلة،

- وتغطي وجهها في رعب وابتسام معاً. مراد يتوقف
(ويضحك)
- مرفت: (تضحك وترميه بفضة المطبخ) يا غيس .
مراد: (يحاول مرة أخرى) "عأااااااوووووو".
(يدخل سليم ويتوقف ليشاهد التمثيلية مبتسماً).
- مرفت: (ما زالت خائفة وتصرخ.) لا لا لا يا مراد؛ عشان
خاطري.
- مراد: (وهو يغادر المكان ويضحك.) كله من ده. كل يوم
من ده (يرى سليم) سليم. سلّم. إزيك؟
سليم: أنا كويس. إيه يا مرفت اللي كان بيحصل ده؟! أبو
رجل مسلوخة على آخر الزمن؟!
مرفت: (مخرجة بالفعل ومبتسمة) إنت هنا من إمتي؟
سليم: حوالي نص ساعة كده. شفت كل حاجة.
مرفت: وسمعت كنا بنقول عليك إيه؟!
سليم: طبعاً. كل حاجة.
- مراد: كذاب. بسّ عموماً أنا هاقول لك. سوسن كانت بنقول
عليك كلام وحش قوي.
مرفت: (لمراد) إنت اللي كذاب.
سليم: لأ ما اصدقش. (يسلم على سوسن في ألفة وود
ظاهر)
- مرفت: تشرب إيه يا سليم؟
سليم: حاجة ساقعة.

- مراد: أخبارك إيه؟ وأخبار الشغل إيه؟
- سليم: كويس. إنتم اللي عاملين إيه؟ طمنوني. لسه كويسين؟!
- مرفت: طبعاً لسه كويسين يا حقود يا عزبنجي.
- سليم: طب هو أنا كنت لقيت حد يرضى بي وقلت لأ. فين صاحبك اللي عايزة تجوزيها لي دي؟!
- مرفت: أجوزها لك إيه يا جدع انت؟! انت هتفضل ضربش كده. إحنا بس عايزينك تشوفها. الجواز ده قرارك انت. كل الموضوع إني باحبها جداً وباحبك جداً، ويتهيأ لي انكم لايقين على بعض.
- سليم: ماشي يا ست مرفت. ما عنديش مشكلة. بس اشوفها.
- مرفت: (محدرة) سليم! دي ست محترمة. بلاش الهيافة بتاعتك، هه. بلاش لعب عيال. إوعى تكسفني.
- مراد: وبعدين انت فعلاً شفتها قبل كده.
- سليم: أنا؟! إمتى ده؟! فين؟!
- مرفت: ف الفرح بتاعنا.
- مراد: فإكر البنت اللي قعدت ترقص لوحدها بعد الفرح ما خلص؛ وانت افكرتها مسطولة أو سكرانة أو حاجة؟
- مرفت: مراد!
- سليم: إنت بنتكلم جد؟! هي دي؟!
- مرفت: إخرس خالص انت وهو. ولا كلمة تانية. البنت

- كانت مبسوطة شويّة وخلص. كان فرح أعز
اصحابها. فيها إيه دي؟! غريبة دي!!؟
- سليم: أنا افكرتها دلوقت. هي دي بقى؟! ... أنا ما
اتكلمتش معاها يوم الفرح، بس فاكرها كويس. شدت
انتباهي.
- مراد: (ضاحكاً) هي تشد الانتباه فعلاً.
- مرفت: مراد! بطل سخافة بقى. سوسن دي فنانة موهوبة؛
موهوبة فعلاً.
- مراد: فعلاً موهوبة. (وينفجر ضاحكاً)
- مرفت: إنتو حمير. وانت يا سليم، الظاهر انك ما لكش ف
الطيب نصيب. إمشي رَوِّح. أنا اللي غلطانة.
- سليم: هو أنا قلت حاجة يا مرفت!! هو أنا لسّه شفتها!!
طبّ هي فين؟! لسّه ما جاتش والّا إيه؟
- مرفت: ف البلكونة؛ مبسوطة من منظر البحر.
- مراد: يمكن بترسم لوحة جديدة والّا حاجة؟!
لوحة إيه؟! سليم:
- مراد: ما هي بترسم لوحات يا سليم. فنانة.
سليم: بجد والله؟! سليم:
- مراد: الحقيقة أنا ...
- مرفت: أنا باحب رسمها جداً. موهوبة فعلاً.
- سليم: وبتشتغل إيه؟
- مراد: فنانة؛ بتشتغل فنانة.

مرفت: والله يا مراد لو ما بطلت كلامك ده، لا انا طاردة
صاحبك ده م البيت.

مراد: مش مهم كلامي عنها يا مرفت. المهم كلام العريس.

سليم: والله انتو عسل. لو كان كل الجواز زي جوازكم
كده، أنا مستعد اتجوز النهار ده.

مرفت: بس تلاقي اللي ترضى بيك!

(تدخل سوسن. تبدو جميلة. تحمل حقيبة على كتفها

تظهر منها كراسات وأقلام الرسم. حول رقبتها

سماعات موسيقى. تتجاهل سليم الذي كان يبتسم

متوقفاً تحية خاصة منها).

مرفت: كل ده ف البلكونة يا سوسن!؟

سوسن: والله متأسفة جداً. الظاهر انا نعست شوية. المنظر
جميل ومريح جداً.

مراد: (يغني) شط اسكندرية يا شط الهوى ..

سوسن: أنا فعلاً وقعت ف غرام البلكونة دي.

سليم: دي أول مرة تيجي اسكندرية؟

سوسن: (تتجاهله) وخط السما هنا لوحة فنية.

مراد: ايه خط السما ده بقى!؟ ما بلاش كلام الفنانين

الصعب ده يا سوسن. إحنا معانا هنا ناس جهلة

خالص. (يشير إلى سليم).

مرفت: الأفق يعني يا أستاذ.

سوسن: والإضاءة رهيبة ...

سليم: الإضاءة حلوة فعلاً. أصل فوانيس الشارع دي جديدة.

سوسن: فوانيس إيه؟! أنا باتكلم عن الغروب، عن نور ربنا.

مراد: أنا متأسف فعلاً. أنا نسيت أعرّفكم على بعض.

سوسن، ده بقى سليم، أعز اصحابنا. سليم، سوسن.

سليم: تشرّفنا. (يمد يده ويتصافحان)

سوسن: أنا فاكرة إني شفتك قبل كده. (لمرقت) أنا شفته قبل كده.

مرقت: ما انا عارفة.

سليم: فعلاً؟! أنا يتهيأ لي احنا ما اتقابلناش قبل كده خالص.

سوسن: ف الفرح؛ فرح مرقت. أظن أنا اتكلمت مع صاحبك

اللي كانت معاك ف الفرح. كانت محامية، مش كده؟

سليم: لأ خالص. قصدي أيوه، محامية؛ بس العلاقة دي

خالص؛ انتهت من زمان.

سوسن: خسارة.

سليم: مش قوي يعني.

سوسن: أنا كنت معجبة بيها جداً؛ .. ذكية ومتففة. أنا اتكلمت

معاها اليوم ده أكثر ما انت اتكلمت معاها. يمكن لو

انت كنت واخذ بالك منها أكثر شوية كنتم ...

مراد: ما تقعدوا يا جماعة. واقفين كده ليه؟

مرقت: تشرّبي حاجة يا سوسن؟

سوسن: ممكن لمون؟

- سليم: (لسوسن) دي أول مرة تيجي اسكندرية؟
- سوسن: أيوه. (ثم أكثر لمرفت) أنا دلوقت فهمت الناس بتحب اسكندرية ليه.
- مرفت: تمام.
- سوسن: (تكمل) الشط والميّه وخط السما، ... المكان عبقرى.
- سليم: طب رحتي شرم الشيخ أو دهب قبل كده؟
- سوسن: لأ.
- سليم: ولا انا. أنا ما اعرفش غير اسكندرية، ... طول عمري باحب اسكندرية. من إمتى يا مراد واحنا بنيجي هنا؟
- مراد: من أولى ثانوي. يعني ييجي من خمستاشر سنة.
- سوسن: ياه! دا انتو تعرفوا بعض من زمان قوي!
- سليم: أيوه.
- مراد: من أول يوم ف أولى ثانوي.
- سليم: إحنا اتعرفنا على بعض ف أول يوم!!
- مراد: أول ساعة كمان. إنت سألتني عن مكان الفصل، وأنا طبعاً كنت زيّك، مش عارف حاجة. وقعدنا نلف سوا غ الفصول ونضحك. وأخذنا أول إنذار ف أول ساعة ف أول يوم ف أول سنة م المدرسة.
- سليم: أيوه أيوه، افكرت. أنا كنت ناسي خالص.
- سوسن: ومن ساعتها وانتم صحاب!؟

- مراد: ما افترقناش عن بعض أجازة واحدة.
- مرفت: مرض بعيد عنك.
- سليم: حاسبي على كلامك يا مرفت. أحسن والله أقول لها على أول يوم اتعرف عليك فيه.
- مرفت: لأ، والنبي بلاش. خلاص، حرمت.
- مراد: وعلاقتنا بقى يا سوسن كانت علاقة غريبة جداً. علاقة تكاملية.
- سوسن: يعني إيه؟! مش فاهمة.
- مراد: يعني من أيام ثانوي، أنا كنت اشوف البنات من دول أقع ف غرامها من أول ثانية؛ وهي تحبه هو. كنا مكملين بعض يعني.
- سليم: نعم؟! إنت كذاب.
- مراد: شوية مبالغة بس.
- سليم: الكلام ده مش صح يا سوسن، ما تصدقي هوش.
- مراد: سليم! ما تخلينيش احكي أكثر من كده. مش فاكتر فائن والّا إيه؟
- سليم: حكاية فائن دي صح. أعترف بدي.
- مراد: وفائن الثانية. كان فيه اتنين فائن؛ فائن سعيد وفائن عمر.
- سليم: صح. كان فيه اتنين فائن. أنا نسيت الثانية دي خالص.
- مراد: وثر يا؟! مش فاكتر ثريا؟! وإيمان عبود.

- سليم: طَبَّ خِلاصِ خِلاصِ. هَسْ. بَسْ انا برضه طلعت
جدع فِ الْآخِرِ وَسَبَبْتَ لَكَ مَرَفَتِ اهْه. لو كانت
طلعت فِ دِماغِي، ...
- مرفت: نعم نعم، وانت مين اللِّي يبص لك انت. دا انا لو كل
رجالة الدنيا ...
- مراد: احترم نفسك يا له.
- سوسن: انا كده بقى اقدر اقول ايني سمعت عنك كفاية.
- سليم: فعلاً؟!
- سوسن: كفاية جداً. إنت بتشتغل ايه يا سليم؟
- سليم: انا محامي فاشل، ورثت مكتب ابويا. عندي ثلاثين
سنة. بس لسه باحاول برضه. وانتي؟
- مرفت: سوسن فنانة.
- سوسن: مرفت!
- مرفت: فنانة عظيمة كمان.
- سوسن: لا، ما تصدقهاش.
- سليم: رقاصة يعني؟!
- مرفت: رسامة يا متخلف يا عديم الإحساس. سوسن فعلاً
فنانة جميلة.
- سوسن: (تضحك) نفسي يا مرفت تبطلني نقولي كده.
- سليم: نوع الفن اللِّي بترسميه ايه يعني؟ تعبيري، سيربالي،
أي هبل، والا ايه يعني؟
- سوسن: نعم؟!

- مراد: (يحملق في سليم غير مصدق) سليم!
- سليم: قصدي يعني المدرسة الفنية اللي بتنتمي لها؟
الواقعية؟ التجريدية؟ ...
- سوسن: أنا باكره كل التسميات دي.
- مراد: قال يعني هو فاهم حاجة م اللي بيقولها.
- سوسن: إنت بتعرف ف الفن؟
- سليم: ف الحقيقة لأ.
- مراد: يا دُوب صفحة الأهرام الثقافية؛ يلقط له كلمتين كل سنة كده وخلص.
- سوسن: أمال بتسأل ليه؟! غ العموم الفن مش ضروري يتفهم. اتفرّج واستمتع وخلص.
- سليم: (يلمس أوراق الرسم التي تحملها) ممكن أتفرّج؟
- سوسن: (في غضب) لأ طبعاً.
- سليم: طيب طيب. خلاص. هو أنا قلت حاجة غلط؟!!
- سوسن: أنا أسمح لك تتفرّج على شغلي ليه يعني؟!!
- سليم: مش عارف؟ أنا بس ...
- سوسن: إنت تبقى لي إيه عشان تتفرّج على شغلي؟!!
- سليم: (ومراد يتحنح لتشتيت الموقف.) عندك حق فعلاً.
أنا إيه يعني؟! ولا حاجة.
- سوسن: الفن ده مسألة شخصية جداً. إنك تشارك حد ف شغلك، تفرّج حد على شغلك، دي مسألة ثقة وقرب. دي علاقة قوية. أنا عمري ما فرّجت شغلي لحد

باخرج معاه لأول مرة؛ قصدي باشوفه لأول مرة.
(ترتبك وتلوذ بالفرار إلى المطبخ بجانب مرفت)
ممكن أساعدك في حاجة يا مرفت؟ خليني أعمل
معاكي حاجة.

مرفت: (تعطيها ملاذاً) خدي قِطْعي السلْطة.

سليم: (يحاصرها عمداً) أخرج معاه أول مرة؟! إيه الكلام

ده؟! إنتم فتحتوا البيت محل عمومي والّا إيه
يا مرفت؟! ... بالمناسبة يا سوسن أنا فعلاً افكرت
إنني شُفتك يوم الفرح؛ ف الآخر لمّا كنتي بترقصي
لوحدك.

سوسن: بجد؟ أنا مكسوفة جداً. مش مصدّقة انك شُفتني فعلاً.

سليم: طبعاً شُفتك؛ ورقصك كان جميل جداً. كنتي مبسوفة

قوي.

(مرفت ومراد يتبادلان النظرات)

سوسن: أصل الفرح كان جميل.

مرفت: بجد يا سوسن؟! أصل انا مش فاكرة منه حاجة

خالص.

سوسن: طبعاً كان جميل. وانتي كنتي زي القمر يا مرفت.

ما انتي فاكرة طبعاً.

مراد: طبعاً فاكرة يا سوسن؛ فاكرة جداً؛ وعندها ألبوم

صور كمان. هي بس عايزة تسمع الكلام تاني.

سنتين بحالهم ولسه ما شبعتش م الكلام عن الفرح.

- مرفت: طَبَبْ والله ما فاكرة حاجة؛ ولا حاجة خالص. أنا غالباً كنت ف غيبوبة والأ حاجة.
- مراد: طبعاً. م الفرحة. كنتي هتلاقي عريس زَيِّي فين؟
- مرفت: يا شيخ رُوح، دا أنا وافقت عليك بالعافية.
- مراد: والنبي؟! مين بقى اللي اتعافى عليكي وأجبرك بقى؟! دا انا اللي كنت متردد، حتى وانا ايدي ف ايد المأذون.
- مرفت: ضميري اللي اضطرني. صعبت عليّ. بس فعلاً أنا مش فاكرة حاجة م الفرحة نهائي. يمكن عشان ما أكلتش حاجة طول اليوم وكنت داخلة والأ حاجة؟
- مراد: نعم؟! ما أكلتيش حاجة؟! ده إنتي ما سيبتيش طبق م البوفيه إلا لما أكلتي منه.
- سليم: طَبَبْ قولوا لي بقى: الجواز عمل فرق ف حياتكم والأ لأ؟ فيه فرق يعني؟
- مرفت: طبعاً فيه فرق.
- مراد: الدنيا أهذا كده، مش كده يا مرفت؟
- مرفت: مضبوط. والحياة الاجتماعية أصح وأظبط.
- مراد: قبل الجواز كان فيه عواطف وحب وكده، بس من غير اتجاه.
- مرفت: من غير بوصلة. بعد الجواز الهدف أوضح.
- مراد: وفيه راحة من نوع غريب كده. أصل الجواز قرار نهائي، قرار التزام، حصار، ما فيش مهرب منه؛

- وده في حد ذاته مريح.
- مرفت: زي ما يكون إعلان نهاية حياة وبداية حياة ثانية.
- مراد: بالضبط.
- سوسن: كلام كويس.
- سليم: يا بختكم.
- سوسن: العزوبية بتستهلك البني آدم. "إهدار للطاقة".
- سليم: فعلاً.
- سوسن: كفاية المجهود اللي ضايح فـ "البحث عن شريك العمر". أصل دي مسألة مجهددة جداً، "تفسياً واجتماعياً" كمان.
- سليم: أنا دلوقت جاهز لفكرة الجواز أكثر من أي وقت فـ حياتي. ونفسي يبقى عندي عيال كثير.
- سوسن: أنا عارفة إحساسك ده. أنا كمان كانت أمنيتي إني اتجوز بدري عشان أخلف عيال كثير، بس النصيب بقى. الواحد كبر خلاص غـ الأمنية دي.
- مرفت: كبرتي يعني إيه؟! دا انتي أصغر مني.
- مراد: (لسليم ومرفت) أنا لما أبص
- سوسن: (يبدو أن سوسن قد جرحت نفسها بسكين المطبخ) ياه. يا ساتر. عورت نفسي ثاني.
- مراد: إيه اللي حصل؟! ورّيني إيدك ...
- سوسن: ما فيش حاجة؛ بسيطة.
- مرفت: إيه اللي حصل!؟!

- مراد: جرحت صباعها.
- سليم: جرح جامد والّا إيه؟!
- سوسن: لّا، لا مافيش حاجة يا جماعة، بسيطة.
- مرفت: (تقترب منها وترى الدماء) سوسن ...
- مراد: (يفتح الحنفية ويغسل لها يدها) حطّي إيدك تحت الحنفية شوّيّة.
- سليم: ما عندكمش صبغة يود ولا قطن ولا حاجة؟!
- سوسن: يا جماعة ما تكبّروش الموضوع. مش عايزة أبوظ الليلة.
- مرفت: (تحضر قطعة قماش نظيفة) إربطي الجرح يا سوسن لحد ما نشوف شاش والا حاجة.
- سوسن: يا جماعة ده خدش صغير.
- مرفت: أنا اللّي غلطانة؛ أصل السكاكين دي حامية قوي.
- سوسن: دي مش غلطتك يا مرفت، ما تكبّريش الحكاية.
- (سوسن تمسك الرباط فوق الجرح وسليم يبحث عن شيء بالأدراج ويجده. يعود حاملاً قطعة من الشاش)
- سليم: إوعى انت وهى. الدكتور وصل. فين العيّن؟
- مرفت: هنا يا دكتور. اتفضل.
- سليم: (السوسن) الجراحة دي دقيقة شوّيّة، ويمكن تكون مؤلمة. معلىش. (يضع الشاشة ويربطها)
- سوسن: (في سعادة) متشكرة جداً يا دكتور.

(مراد ومرفت ينسحبان بعيداً إلى المطبخ، عمداً على ما يبدو)

سوسن: أنا مكسوفة من نفسي جداً.

سليم: ليه بقى؟!!

سوسن: حاسّة إني شكلي كان غبي قوي.

سليم: لأ طبعاً.

سوسن: قطعت كلامكم وبوّطت عليكم اليوم.

سليم: الكلام يتوصّل تاني، واللي باظ يتصلّح. وبعدين

كانت فرصة الواحد يشوف صوابك ويعدهم كويس.

(يمسك يدها ويعد الأصابع) خمسة ف كل إيد فعلاً.

أصل الواحد اليومين دول لازم يفحص البضاعة

كويس قوي.

سوسن: (تضحك) البضاعة؟!!

سليم: إيديكي حلوين فعلاً.

(تضحك).

صمت موجز، مشدود بالرغبة وكيمياء التلاقي

(الأول)

(تخفت الإضاءة وتنطفئ)

المشهد الثاني

(خمسة أشهر بعد نهاية الفصل الأول.

الربيع.

في صالة منزل مراد ومرفت.

مرفت وسوسن تجلسان.

يبدو أنهما الآن في منتصف حديث دائر منذ بعض

(الوقت)

سوسن: ولمّا الأب يوعد بنته الصغيرة إنه هيكلمها فُ

التليفون الساعة تمانية، مش يتصل؟!!

مرفت: هو ما اتصلش؟! مش معقول!!!

سوسن: ولا تسعة ولا عشرة ولا حداثر.

مرفت: إخص.

سوسن: والبنيت كانت مكتتبة جداً؛ ودموعها ما بطلتش لحد

ما نامت. وانا قعدت أهدّيها.

مرفت: يا عيني يا بنتي.

سوسن: (تكمل) وهو قاعد لي مع الست بتاعته دي؛ وبنته

عمالة تحاول تتصل بيه. ولا هو هنا.

مرفت: يا حول الله يا رب.

- سوسن: وهو ولا هو هنا يا مرفت، ولا حاسس.
 مرفت: وما اتصلش بيها خالص؟!
 سوسن: لأ اتصل أخيراً. بس اتصل الساعة واحدة بعد نص الليل عشان يطلب مني أتأسف لها.
 مرفت: إيه الغباء ده!
 سوسن: طب ما تتصل بيها بنفسك أول ما تصحى الصبح، واتأسف لها بنفسك يا أخي!!
 مرفت: أنا فعلاً مش قادرة اصدق اللي بيحصل ده! هو كان طول عمره كده يا سوسن؟! والا ده بس بيحصل بعد الناس ما تنفصل عن بعضها؟! ... هم بيبقوا أغيبا والا إيه؟!
 سوسن: مش عارفة والله.
 مرفت: الرجالة دول يقعدوا سنين ساكتين وما بيتكلموش؛ وبعدين فجأة كده يتكلموا؛ ولما يتكلموا ويفتحوا بقهم يقولوا لك احنا لازم نتطلق.
 سوسن: وانتى ومراد بتكلموا والا لأ؟!
 مرفت: آه، .. (صمت) أنا والله يا سوسن حاسة زي ما اكون ما شفتكيش من يبجي عشرين سنة.
 سوسن: وأنا كمان.
 مرفت: بس انتى شكلك كويس؛ شكلك مبسوطه.
 سوسن: متشكرة.
 مرفت: إحنا كنا قلقانين عليكى جداً.

- سوسن: بجد؟
- مرفت: بس انتي قطعتي خالص فجأة يا سوسن. لا زيارات ولا تليفونات ولا حاجة خالص. ليه كده؟! كان فيه ايه؟!
- سوسن: أنا متأسفة بجد. بس الحقيقة أنا كنت عايزة ابقى لوحدي شوية. مش عارفة ليه.
- مرفت: أنا فاهمة. أنا قعدت اقول لنفسي: أحسن سوسن تكون زعلانة مني والأ حاجة. إنت كنتي زعلانة والأ حاجة؟
- سوسن: أنا؟! زعلانة؟! منك انتي؟! طب وازعل منك ليه؟! لأ طبعاً.
- مرفت: ... مش عارفة؛ أصل ف أول موضوع الطلاق كنتي بتكلميني كل يوم، كذا مرة ف اليوم الواحد.
- سوسن: أيوه صح.
- مرفت: وكنتي على طول هنا، ليل نهار. وبعد شوية ...
- سوسن: أصل أنا حسيت إنني بقيت مملّة، وثقيلة، ودمي ثقيل.
- مرفت: إخص عليك. ما تقوليش كده. إحنا أكثر من أهل.
- سوسن: دا أنا نفسي زهقت من نفسي.
- مرفت: بس انتي متأكدة إنني ما ضايقتكيش ف حاجة؟ ولا حاجة؟
- سوسن: أنا اتضايقت منك يا مرفت؟!!! طبعاً لأ.
- مرفت: أصل ممكن تكوني يعني حسيتي إنني كنت السبب ف

اللّي حصل ده.

سوسن: يا نهار ابيض! ايه الكلام الغريب ده؟! بلاش عباطة بقى!

مرفت: ما هي كانت فكرتي إننا نعرفكم على بعض.

سوسن: طبّ و ايه يعني؟! إحنا الاتنين كنا كبار وناضجين؛ وكنا عارفين كويس إحنا بنعمل ايه.

مرفت: أيوه؛ بس برضه انا اللّي بدأت الحكاية كلها.

سوسن: إنتي عملتي اللّي انتي كنتي فاكرة إنه صح. وبعدين الجواز ده قسمة ونصيب؛ والطلاق برضه قسمة ونصيب يا مرفت. ما حدّش يقدر يقف ف وش القدر والنصيب، صح؟

(صمت)

مرفت: وطبعاً انتي رُحتي غارقانة ف الاستوديو بتاعك والشغل بتاعك ونسيّتي الموضوع؛ ونسيّتنا احنا كمان يا ستي.

سوسن: الحقيقة لأ. أنا ما دخلتس الاستوديو بتاعي من يومها.

مرفت: ليه يا سوسن!؟

سوسن: يمكن عشان الضغوط اللّي كنت باهرب منها بالرسم والاستوديو راحت خلاص.

مرفت: بس ما تقلقيش. شويّة كده والوحي هيرجع تاني وترسمي زي ما انتي عايزة. عندك الوقت اللّي ف

الدنيا كله.

سوسن: أنا مش قلقانة بالحكاية دي. أنا حتى مش عايزة
ارسم تاني خالص.

مرفت: ليه يا سوسن؟! اكتباب ده والّا إيه؟!!

سوسن: بعد سليم ما سابني على طول، وانزاح الهم الثقيل ده
من على صدري، راجعت حياتي يا مرفت. بصّيت
على حياتي كده، ولقيت إن كل اللي حصل لي ده
ولا حاجة؛ مش مهم؛ وما لهوش أثر.

مرفت: بجد؟!!

سوسن: أيوه. ولقيت إن سليم كان عنده حق فعلاً لما كان
بيقول لي إني باستعمل الرسم والاستوديو عشان
اهرب م العلاقة دي.

مرفت: إزاي بتقولي كده؟! وكمان ازاي تسيبي الرسم بعد
كل السنين دي؟! بعد كل اللي اتعلمتيه وعمليته ده؟!!

سوسن: خَلينا نبقى صُرْحاً سَوَا يا مرفت ونواجه الحقيقة.
الحقيقة إن شغلي ما كانش حلو ولا حاجة.

مرفت: لأ كان حلو طبعاً؛ كان حلو جداً.

سوسن: ما فيش داعي تطبطبي على يا مرفت. أنا عارفة،
ومش متضايقَة خالص. نهائي.

مرفت: أنا كنت باحب شُغلك.

سوسن: المرحلة دي من حياتي خالص؛ انتهت خالص؛ وما
لهاش أي أهمية عندي خالص.

- مرفت: كلام غريب! طيب كنتي فين بقى كل الشهور اللي فانت دي؟! ... كنتي بتعملي ايه طول الوقت ده؟!
سوسن: كنت باروح جلسات علاج نفسي، مرتين ف الأسبوع.
مرفت: كويس.
سوسن: وكمان اتعرفت على واحد راجل كويس؛ راجل محترم بجد.
مرفت: كويس جداً. طب ما قلتي ليش ليه يا جبانة؟!
سوسن: راجل كويس بجد. بني آدم جميل.
مرفت: اسمه ايه؟
سوسن: عز. عز الدين.
مرفت: اهي دي الاخبار اللي تفرح. وقابلتيه ازاي؟
سوسن: ف الحقيقة أنا اعرفه من سنين، من زمان جداً. من تقريباً عشر سنين.
مرفت: صحيح؟!
سوسن: كان بيشتغل مع سليم؛ زميله ف الشغل.
مرفت: مع سليم؟!
سوسن: أيوه.
مرفت: ماشي.
سوسن: المهم، هو اتصل يسأل على سليم...
مرفت: ...
سوسن: قلت له إن سليم مش موجود؛ وإنه مش عايش ف

البيت معنا؛ وشرحت له شويّة كده ...

مرفت: ...

سوسن: وكان طيب وعاطفي جداً. وبس.

مرفت: وبس إيه؟!

سوسن: ... اللي حصل إن هو كمان جوازته باظت ...

مرفت: ...

سوسن: .. واتقابلنا مرّة سوا، واتكلّمنا؛ عارفة

يا مرفت، أنا لقيت إننا، أنا وهو يعني، عندنا حاجات
مشتركة كثير جداً.

مرفت: ...

سوسن: بس، وبقينا نتقابل أكثر؛ ... وخلص. دي كل
الحكاية.

مرفت: كويس. واضح إن الدنيا ماشية كويس معاكي. مهم
برضه إن يبقى عندك اصحاب جُداد.

سوسن: الحقيقة، .. العلاقة دي أكثر من صحوبية. (مرفت

تنظر إليها في بعض الدهشة. سوسن تطلق فجأة

ضحكة عالية) .. أنا متأسفة. أصل انا فرحانة،

ومكسوفة كمان. أنا حاسّة زي ما اكون بنت صغيرة

ف الإعدادية ...

مرفت: وإمتى ابتدت العلاقة دي؟!

سوسن: من كام شهر كده.

مرفت: كام شهر!!?

- سوسن: دلوقت هو بيعلمني ألعب تنس.
 مرفت: ...
- سوسن: وبقيت كويسة والله. وساعات بنخرج بالليل مع بعض.
- مرفت: واشترיתי لبس رياضة وكوتشي ومضرب وكده!!؟
- سوسن: كل حاجة طبعاً. إنتي لازم تجربتي التنس يا مرفت.
- مرفت: إوعي تقولي كده قدام مراد.
- سوسن: عز يا مرفت راجل مليون حيوية؛ راجل حي؛ وتلقائي ومتفائل. شريك حياة جميل فعلاً.
- مرفت: كده!!؟ بسرعة كده!!؟
- سوسن: قصدك إيه؟!
- مرفت: ده موضوع الطلاق لسه يا دوب، لسه سُخن يا سوسن!! دا سليم لسه ما خرجش مَ الشارع!!
- سوسن: مش فاهمة قصدك يا مرفت.
- مرفت: أنا كنت فاكرة إنك عايزة تبقي لوحديك شوية كده عشان تفكّري بهدوء ورواقة. إنتي كنتي متجوزة اتناشر سنة بحالهم، وما عشتيش لوحديك من اتناشر سنة.
- سوسن: انا كنت طول الوقت ده عايشة لوحدي يا مرفت. ما انتي عارفة. دي ما كانتش علاقة جواز. أنا كنت لوحدي طول الوقت.
- مرفت: ماشي؛ بس برضه مش صح إنك تدخلني ف علاقة

تانية على طول كده.
سوسن: أنا باحبه يا مرفت.

(صمت)

مرفت: يعني ايه؟! إزاي يعني؟! حصل إمتى ده؟!!

سوسن: أنا فعلاً باحبه.

مرفت: دا انتي يا دُوب تعرفيه من ثلاث شهور بس.

سوسن: أنا عارفاه من زمان.

مرفت: عارفاه منين؟! من كلام سليم عنه؟!!

سوسن: لأ. إحنا خرجنا مع بعض كلنا كام مرّة. أنا وهو

وسليم ومراته؛ قصدي أنا وسليم وهو ومراته.

مرفت: بس ده نوع مختلف من المعرفة يا سوسن.

سوسن: أنا كان قصدي اقول إنه مش واحد غريب عني؛ وإن

كل المقدمات وروتين التعارف وكده ما كانش

موجود. كان فيه تاريخ للعلاقة. قصدي ما كانش فيه

وقت ضايع ف التعارف.

مرفت: ... أنا اقدر افهم فرحتك؛ واقدر افهم لهفتك. بس

حب يا سوسن؟! مرّة واحدة كده؟!!

سوسن: وليه لأ؟! ايه اللي صعب يتفهم ف ده؟!! ما على

يدك، أنا وسليم حبينا بعض من أول يوم. وانتي

كنتي مبسوطة كمان. واتجوزنا بعد شهر واحد. إنتي

كنتي هناك، ف قلب الموضوع كله؛ ناسية والا

ايه؟!!

مرفت: طَبِّ ما انتي شايفة النتيجة كانت إيه يا سوسن. أنا اتعلمت مَ اللِّي حصل، ومش هاكرِّره تاني.

سوسن: يعني أنا اللِّي ما اتعلمتَش يا مرفت؟! أنا التلميذة الخايبة بقى؟! وانتِي الألفَة بتاعة الفصل؟! طَيِّب. حلال عليكِ يا ستي. أنا، على أي حال، مش عايزة ابقى الألفَة بتاعة أي فصل.

مرفت: أنا بسْ عايزاكي تبقي حريصة أكثر يا سوسن. مش عايزة اللِّي حصل يتكرَّر. مش عايزاكي تتوجعي تاني.

سوسن: إنتِي دلوقت عاملة زِي ما تكوني مدرسة خصوصي بتعلمي تلميذة ما قدرتش تفهم الدرس بتاعها ف الفصل.

مرفت: إنتِي لسَّه هسَّه يا سوسن. جرحك لسَّه ما طابش.

سوسن: أنا مش هسَّه يا مرفت. وبلاش الكلام ده لو سمحتي.

مرفت: أنا مش عايزة حد يجرحك تاني.

سوسن: إحنا هنتجوِّز.

(لحظة صمت قصيرة وكثيفة للغاية)

مرفت: ...

سوسن: عز غير سليم. غيره خالص. اتنين مختلفين عن

بعض خالص. بعيد عن بعض خالص. السما

والأرض. عز مش راجل ملاوع. ما عندهوش

ألاعيب وخطط زِي سليم؛ واللِّي ف قلبه على لسانه.

ومش خايف إنني أشوفه وأفهمه. (صمت) أنا وسليم
كنا طول الوقت زي ما نكون بنلعب استغمائية،
وساعات شد الحبل. أنا مش عايزة ده يحصل مع
عز. أنا باحبه وهو بيحبني؛ ولا أفكار ولا ألعيب
ولا فلسفة. هو عايزني وأنا عايزاه. ببساطة كده.

مرفت: طيب. ربنا يوفِّقكم يا سوسن.

سوسن: وعلاقته بالعيال جميلة؛ بيحبه جداً. لو شفتيه
معاهم، خصوصاً مع الولد الصغير، تقولي عليه أبوه
الحقيقي.

مرفت: ...

سوسن: الدنيا كانت كئيبة وثقيلة علينا قوي يا مرفت بعد
سليم ما ساب البيت. إنتي ما عندكيش فكرة الأيام
كانت بتمر علينا ازاي.

مرفت: لأ عندي.

سوسن: أنا كان يتهياً لي إن العيال دي مش هتقدر تضحك
تاني. اكتباب فظيع.

مرفت: أكيد. أنا فاهمة.

سوسن: أنا مش صغيرة يا مرفت، وعارفة أنا باعمل إيه.
عز هو الراجل اللي ربنا اختاره لي. أنا مؤمنة بكده،
ومش هافرط فيه. أنا ساعات يتهياً لي إن ربنا
خلّاني اتجوّز سليم عشان بس أنضج أكثر، وافهم؛
عشان أقدر أشوف إن عز هو الراجل اللي مقسوم

- لي.
- مرفت: يمكن كلامك صح. أنا بس كان نفسي تتأني شوية.
- سوسن: واضيِّع اللحظات الجميلة دي؟! لا طبعا. أنا مش مستعدة اضيِّع أي لحظة تانية من حياتي. إنتي مش فاهمة يا مرفت؛ مش فاهمة. بُصي يا مرفت، أنا مش عايزة اتكلم ف الموضوع ده؛ ...، ... لو سمحتي ما تكلمينيش ف الموضوع ده.
- مرفت: ايه؟!!
- سوسن: هو انتي فاكراني اتجننت والّا ايه؟!!
- مرفت: أنا ما قلّتش كده خالص.
- سوسن: هي دي فرصتي الحقيقية. ده هو الرجل الحقيقي اللي انا عايزاه. إنتي الظاهر مش عايزاني أعيش سعيدة وناجحة.
- مرفت: ايه الكلام البايخ ده يا سوسن؟! أنا أكثر واحدة عايزاكي تبقى سعيدة وناجحة.
- سوسن: أنا أخيراً جاسّة إنّي أنتي متكاملة؛ حاسّة إنّي لقيت طريقي ف الدنيا دي؛ وعمّالة احكي لك ده، وانتي عمّالة تكسّري ف مجاديفي.
- مرفت: لا باكسّر ف مجاديفك ولا حاجة يا سوسن. أنا بس عايزة أحميكي من غلطة تانية ووجّع تاني.
- سوسن: ...
- مرفت: عايزاكي تعيشي لوحدك شوية كده وتراجعني اللي

حصل. أنا لو كنت ف مكانك كنت هاعمل كده.

سوسن: أولاً: إيه الحلو بقى ف إن الواحد يعيش لوحده!!؟
إيه الحلو اللي ف كده يا مرفت!!؟ وثانياً: إنتي مش
ف مكاني؛ وعمرك ما كنتي ف مكاني. اللي إيدته ف
المية يا مرفت مش زي اللي إيدته ف النار.

مرفت: سوسن!

سوسن: إنتي اللي لازم تقعدي تفكري شوية وتشوفي إنتي
بتعملي في كده ليه؟

مرفت: يعني إيه!!؟

سوسن: ... أنا يتهيأ لي إنك بتبقي سعيدة ومرتاحة طول ما
انا اكون مش سعيدة ومتلخبطة. إنتي بتكوني
مستمتعة لما اكون محتارة وهشة وكئيبة؛ لما اقعدي
اتصل بيكي كل يوم وأجي لك واقعد اشتكلي لك
حالي. إنتي بتبقي ف قمة الراحة وأنا باحكي لك
همومي واسألك رأيك. مش كده؟

مرفت: الكلام ده مش صحيح!!

سوسن: لأ صحيح، وصحيح جداً كمان. طول ما انتي
شايفاني عاجزة وحزينة، طول ما انتي موافقة علي.
وأول ما افوق شوية كده وأشم نفسي، تنزلي علي
تكسير. أول ما ابتدي أعبر عن رأيي واختار لنفسني
تخليني أحس بالذنب والخيبة والغلط.

مرفت: إزاي تقولي كده يا سوسن!!!؟

سوسن: كفاية بقی یا مرفت. كفاية. إنتي عايزاني ابقى حتة
خرقة تمسحي بيها حزنك وفشلك؛ مراية تشوفي فيها
خيبة الناس ونجاحك. الناس عندك مجرد حكايات
تثبت لك إن اختيارك كانت هي اللي صح، وتثبت
لك اللي إنتي فيه. الناس عندك حكايات فشل تعزّيكي
وتقول لك: "بُصي يا مرفت، فيه ناس عايشة أوحش
منك أهه". لأ يا مرفت. كفاية كده.

مرفت:

سوسن: ولو انتي فاكرة إنك الوحيدة المستقرة عاطفياً، وإن
جوازتك ناجحة، أنا باقول لك لأ. أنا كمان أقدر
أنافسك واعمل جوازة أنجح وأسعد.

مرفت: إيه اللي بتقوليه ده؟! تنافس إيه وبتاع إيه؟!!

سوسن: طبعاً. عندك حق. ما فيش مجال للمنافسة. ما فيش
مجال للمقارنة. أنا مش قدك، ولا أقدر أوصل لك.

مرفت: ...

سوسن: إنتي طول عمرك تطبطبي عليّ عشان تخليني أحس
إني ضعيفة، وإني محتاجاكي؛ وانتي تحسي بالقوة
والثبات والانتصار؛ مش كده؟

مرفت: أنا عمري ما تصوّرت إنك ممكن تفكّري فيّ كده!!

سوسن: مش كل الناس تقدر تبقى زيّك يا مرفت.

(صمت،

لا تتحركان فترة طويلة.

بعد فترة، تأخذ سوسن يد مرفت في كفيها كأنها

(تصالحها)

سوسن: ربُّنا وحده اللّٰي يعلم أنا كنت قد ايه حزينه ومجهدة
ومجروحة.

مرفت: إحنا ما كانش ف حياتنا حاجة أحلى من صُحبتكم
وزياراتكم لنا؛ إننا نقعد ناكل ونتكلم ونهزّر.

سوسن: إحنا كمان كنا بنحب ده قوي.

مرفت: إنتم عيلتي.

سوسن: أنا عارفة.

مرفت: أنا قعدت عشرين سنة من عمري أحاول اتخلص من
عيلتي؛ والعشرين سنة الثانية أحاول اعمل عيلة
جديدة؛ عيلة أنا اللّٰي أختارها. إنتم كنتم عيلتي اللّٰي
أنا اخترتها يا سوسن.

سوسن: مبروك. العيلة الثانية طلعت أنيل م الأولانية.

(صمت) ... قولي لي: العيال أخبارهم ايه؟ ...

وانتي ومراد أخباركم ايه؟

مرفت: (مشنتة الذهن) كويسين. كويسين يا سوسن.

(صمت)

(تخفت الإضاءة)

(إظلام تام)

المشهد الثالث

(نفس اليوم. مقهي حديث هادي.)
مراد يجلس على طاولة وحده؛ يشرب قهوته في
بطء، واعياً بنفسه وبأنه في انتظار شخص ما؛
ويحاول ألا يظهر قلق الانتظار.
إنه في انتظار سليم الذي تأخر عن مواعده.
ينظر إلى ساعته، يرشف قهوته، يقرأ في جريدته؛
وينظر حوله ما بين اللحظة والأخرى.
يدخل سليم، خفيفاً ورشيقاً، في ملابس صيفية مرحة
قليلاً)

سليم: متأسف يا مراد غ التآخير .

مراد: أخيراً هل هلاكك .

(يتعانقان)

سليم: وَحَسَنَتِي يَا مَرَاد .

مراد: وانت كمان .

سليم: بقى لك كثير قاعد مستني؟

مراد: كام دقيقة كده .

سليم: متأسف فعلاً . الاجتماع ...

- مراد: (يسكتة عن الاعتذار) تأخذُ قهوة؟
- سليم: يا ريت. (ينادي على الجرسون) بقى لي كام أسبوع
ما شفتكش يا مراد؟
- مراد: طبّ قول كام شهر.
- سليم: كام شهر؟! ... فعلاً؟!!!
- مراد: اللي واخذ عقلك ...
- سليم: إزّي مرفت؟ ... لسّه زعلانة مني؟
- مراد: شويّة.
- سليم: يا ساتر، دي زعلها وحش قوي. قلبها اسود قوي.
- مراد: الموضوع كان صعب عليها برضه يا سليم. ما
تبقاش ظالم رايح جاي كده. إنت جيت ازاي؟ ركن
العربية فين؟
- سليم: أنا جيت بتاكسي. العربية مع لبنى. أصل عربيتها
ف التصليح.
- مراد: وهترُوح للعيال بتاكسي برضه؟!!
- سليم: لأ، مش هارُوح الأسبوع ده. الأسبوع ده بتاع لبنى.
النهار ده رايحين عند ناس صحابها. أنا مش عايز
مشاكل، إنت عارف.
- مراد: ...
- سليم: أصل أي تغيير مفاجئ ف الخطط بينرفزها جداً.
- مراد: مفهوم. بس إنت شكلك كويس يا مراد.
- سليم: ربنا يخليك. أنا كمان حاسس إنني كويس. بدأت

اعمل رياضة من ثاني.

مراد: صحيح؟!

سليم: وخسيت شوية صغيرين كده.

مراد: لا خسيت كثير الحقيقة.

سليم: أنا ولبنى بنصحي كل يوم الساعة ستة الصبح، ..

مراد: ستة؟! ... بدري قوي عليك ده.

سليم: ونجري كل يوم غ الريق كده، ... أربعة خمسة كيلو

كل يوم.

مراد: وبتقدر على كده؟!

سليم: ونرجع بقى، ناخذ دُش دافي جميل سوا، ونعمل

أباحة، ...

مراد: قول لي كده بقى. وأنا اقول ايه اللي هيصحيه ستة

الصبح. دا انت كنت خم نوم طول عمرك.

سليم: ... وبعدين انزل الشغل. ده بقى نظام يومي الجديد.

حياتي اتغيرت خالص يا مراد. ونظرتي للحياة كمان

اتغيرت جداً.

مراد: أكيد دُش الصبح، والذي منه، هم السبب.

سليم: (ينحني للأمام موشوشاً) دا انت ما تعرفش الذي منه

ده يا مراد ...

مراد: يا بخنك يا عم.

سليم: لبنى عندها خيال وجرأة ف الموضوع ده لا يمكن

تتخيلها؛ وعندها فلسفة وحكمة كمان. دي خلقتي

اعرف فعلاً إن السن ما لهوش علاقة خالص
بالموضوع ده. أنا بقيت اشوف نفسي كتكوت
صغير؛ يا دوب عندي ثلاثة واربعين سنة.

... مراد:

وعلاقتها بجسمي يا مراد مستريحة جداً. أنا عمري
ما شفت حد كده. سوسن كانت علاقتها بجسمي
وحشة.

مراد: فعلاً؟! دا انا كنت فاكر إن ...

سليم: (يكمل) وانا كنت ازاي انتظر منها كده وهي نفسها
علاقتها بجسمها كانت وحشة جداً. الجنس مع سوسن
كان حمل ثقيل قوي. الرغبة ما كانتش المشكلة أبداً.
المشكلة كانت الكلكعة اللي ف دماغ سوسن.
والموضوع إتنيل خالص كمان وكمان بعد ما خلفت
العيال.

.... مراد:

سليم: مع لبني الموضوع مختلف تماماً. أنا وهي متفاهمين
جنسياً جداً. دي لو بس مسكت صباغي، أو بصت
لي بصة معينة كده، والأضحكت الضحكة بتاعتها
دي، أضيع انا على طول؛ أبقى زي التور.

مراد: ويا ترى عندكم وقت بقي تتكلموا وتتناقشوا وكده؟

سليم: إنست بتهزّر؟! طبعاً. ده احنا طول الوقت بنتكلم.
نقعد نفكر علاقتنا ابتدت ازاي، واطوّرت ازاي،

وبَقَّتْ إِيه، ... وكده يعني. كلام كثير، وجنس كثير،
وضحك ما بيخلصش. أنا بقى لي شهرين ف الجنة.

مراد: ...

ولبنى كمان "مُسْتَمِعَة جِيْدَة"؛ بتسمعني كويس.

مراد: ...

سليم: أنا اتولدت من جديد يا مراد؛ اتخلقت من جديد.

الست دي نفخت ف حياتي الروح من تاني.

مراد: جميل فعلاً. أنا مبسوط لك جداً يا سليم. (يسرح

لبرهة ثم يلحظ أن سليم يحملق فيه) إيه؟! بتبص لي

كده ليه؟!!!

سليم: إنت كنت بتفكر ف إيه يا مراد دلوقت حالاً؟

مراد: قصدك إيه؟!!

سليم: ما تستهبلش علي. إحنا فاهمين بعض كويس. دي

عشرة عُمُر؛ والآن أنت ناسي؟! أنا عارف البصّة

دي.

مراد: لا ولا حاجة. أنا كنت باسمعك بس. كنت بافكر ف

كلامك.

سليم: ...

مراد: إنت مش عايزني أتكلّم، صح؟

سليم: يعني إيه؟!!!

مراد: مش أنت اللي قلت لي كده؟! إنت ناسي والآن إيه؟!!

سليم: بطل بقى. أنا قلت لك كده لما أنا كنت لسّه متلخبط.

مراد: ودلوقت خلاص؟! مش متلخبط خلاص!؟

سليم: ...

مراد: طيب قل لي الأول قواعد النقاش؛ قل لي دستور القعدة دي. عايزني اتكلم ف ايه وما اتكلمش ف ايه؟ عايزني اقول ايه وما قلش ايه؟ قل لي الأول عشان ابقى فاهم.

سليم: مراد!

مراد: ايه يا سليم! مش إنت اللي قلت لي كده!

سليم: بلاش غلاسة.

مراد: طيب؛ ماشي. عايز تعرف أنا كنت بافكر ف ايه؟ عايز تعرف؟ أنا يا سيدي كنت بافكر فيك، ف إنك راجل متقلب وهوائي. خلاص؟ عرفت؟ تمام؟

سليم: أنا مش هوائي ولا متقلب يا مراد. كل اللي كنت عايز اقله لك إني كنت عايش ميّت. كنت باموت. ما كانش عندي أي رغبة ف العيشة. حياتي كانت طريق مسدود، وممل، وما كانتش لها علاقة خالص باللي جوايا.

مراد: ...

سليم: وما كانش فيه علاقة بيني وبين سوسن. نهائي. كل الكلام اللي كان بيننا كان "إنت تاخذ الولد الصغير عند صاحبه، وأنا آخذ الكبير تمرين الكورة بتاعه"، وحاجات م النوع ده. بقى دي علاقة دي!!؟

مراد: أنا فاهم. بس احنا لازم برضه نضحّي عشان عيالنا
يا سليم. التضحية دي هي تمن الجواز والأسرة.

سليم: بس الواحد لازم يكون عايز الحاجة اللي بيدفع تمناها
يا أخي.

مراد: مش فاهم قصدك إيه.

سليم: إنت ومرفت مثلاً: إنتو عايزين بعض، عايزين تبقوا
سواء، وعايزين تدفعوا تمن ده. أنا لأ؛ وسوسن لأ
كمان. أنا كنت عايش حاجة ضد طبيعتي، ضد
تكويني.

مراد: إيه هي الحاجة دي اللي ضد طبيعتك يا سليم؟! أنا
مش فاهم.

سليم: الاستقرار، والزوجة، والعيال. كل ده ما كنتش
عايزة، غ الأقل وقتها. أنا عملت كده لأنني كنت فاهم
إني لازم أعمل كده؛ لأن كل الناس بتعمل كده.
بالظبط زي الشغلانة اللي اشتغلتها. أنا طلعت
محامي لأنني كنت فاهم إني لازم ابقى محامي زي
ابويا. من وانا عندي عشر سنين وانا فاهم إني لازم
اطلع محامي وامسك مكتب ابويا. أنا طول عمري
باعمل حاجات أنا مش عايزها؛ والسبب إني كنت
فاهم إنها حاجات لازم اعملها. ده كان غلط يا مراد.

مراد: هو كان حد ضربك على إيدك يا أخي؟! حد خدك
وجوزك بالعافية؟! حد ربطك ف كرسي بكلية

الحقوق وقال لك لازم تطلع محامي؟! ما انت اللي عملت كل ده؟

سليم: ودلوقت عرفت إني كنت غلطان، ومش سعيد. مش لازم بقى الواحد يصلح غلطاته؟! والآن انت رأيك إيه؟!

مراد: يا سليم أنا عشت جنبك إنت وسوسن سنين طويلة؛ عُمر طويل؛ ..وكنت شايفك سعيد جداً. أجيب لك مصحف أحلف لك عليه إنك كان شكك سعيد؟!

سليم: شكلي سعيد. صح. عندك حق. شكلي بس اللي كان سعيد يا مراد. أنا كنت بامثل السعادة طول الوقت. كنت باقنع نفسي إني سعيد. كنت عايز ابقى زيكم، وزَي الناس المتجوزين. بس ما قدرتش يا مراد؛ ما قدرتش.

مراد: أنا مش فاهم يا سليم. أنا ما شفتش أي علامة تقول لي إنك مش سعيد. وزَي ما انت قلت من شويّة، إحنا عشرة عمر، بنفهم بعض من بصّة ومن ضحكة. أنا، للأمانة بقى، عمري ما شفتك مش سعيد؛ عمري ما شفتك متألم.

سليم: كنت مخبّي. كان مستخبّي.

مراد: كل السنين دي يا مراد؟! كل الصيفيات اللي رحنا فيها المصيف سوا؟! والخروجات والسينمات والمسارح وليالي السهر دي؟! إنتاشر سنة يا سليم؟!

وبعدين كنت مخبّي ليه؟! ما قلت ليش ليه?!

سليم:

مراد: عايز تقول لي انك كنت بتغشني؟! كنت بتغشنا كلنا طول السنين دي؟! ...

سليم: وكنت باغش نفسي قبلكم كمان.

مراد: لأ. إنت ما كنتش بتغش نفسك أيامها يا سليم. إنت دلوقت اللي بتغش نفسك. إنت كنت سليم اللي أنا اعرفه طول عمري. كنا عايشين بنفرح سوا ونتألم سوا، زي كل الناس، مع بعض. كنا بنتشارك ف كل صغيرة وكبيرة ف حياتنا؛ من أول طهارة الصبيان وخيبة منتخب الكورة، لحد مشاكل الشغل والفلوس والجواز. أنا كنت فاكر انك موجود معايا بجد؛ إن قلبك معايا بصحيح. دلوقت عشان عايز تبرر اللي إنت بتعمله عايز تطلع كل ده كدبة؟! كل ده ما كانش موجود؟! ما حصلش!؟

سليم: ما تاخدش الموضوع شخصي كده يا مراد.

مراد: أمال آخد الموضوع ازاي يا سليم؟! إنت قلت إن حياتك ما كانش لها معنى؛ إنها ما كانتش حقيقية. مش انت قلت كده؟! وحياتك دي مش كلها كانت معنا يا سليم!؟

سليم: أنا ما كنتش اقصدك انت ومرفت. ما كنتش اقصد علاقتي بيك؛ وعمري ما قلت على علاقتنا كده. إنت

أعز اصحابي.

مراد: ...

سليم: وعشان كده تحديداً يا مراد، عشان إنت أعز اصحابي، المفروض إني أقدر أقول لك كل الكلام ده. المفروض إني حتى أقدر أقول لك إن علاقتي بيك كانت خدعة؛ وإنها كانت ضد طبيعتي. والمفروض إنك تقدر تسمع ده كويس؛ وتعرف إن العلاقة الحقيقية مش خط مستقيم، مش مسلسل تليفزيون.

مراد: ...

سليم: أنا كنت باتكلم على نفسي يا مراد، على علاقتي بنفسي، علاقتي بسوسن؛ مش على علاقتي بيك إنت ومرفت..

مراد:

الحاجات كلها حنة واحدة يا سليم. الحاجات مش بسيطة ومسطحة كده زي ما بتحكيها. ما كانش فيه حاجة اسمها نفسك، ولا حاجة اسمها انت وسوسن. إحنا كنا هناك. أنا ومرفت ويوسف وكريم وسمية. كلنا كنا هناك ف قلب الجوازة دي؛ ف قلب علاقتك بنفسك وبسوسن. إحنا كنا جزء من عيشتك اللي ما عجبتكش، اللي ضد طبيعتك. دا الواد يوسف يا أخي لسه مكتتب بسبب طلاقك. إنت عارف إنه كان بيحبك قد إيه. إحنا كنا حنة من ده يا سليم. إنت

رمىت كل ...

سليم:

أنا ما رميتش حاجة.

مراد:

لأ رميت. إنت كل اللي عملته إنك رميت ومشيت.
أنا ممكن افهم إن فيه أسباب. بس أنت لازم تدور غ
الأسباب الحقيقية دي بجد وتبطل غش. أنا ف رأيي
إن الأسباب لا هي سوسن ولا هي لبنى ولا هي
العيشة اللي ضد طبيعتك دي.

أمال إيه يعني!!؟

سليم:

مش عارف. لو كنت كملت كنا ممكن نعرف.

مراد:

مراد!

سليم:

أنا كل اللي عايز اقله يا سليم إنك كنت بتبني ف
حاجة حلوة، رغم كل الظروف، ونجحت؛ .. أو
على الأقل نجحت ف التظاهر بالنجاح. أعز
اصحابك افتكروا فعلاً إنك نجحت. وبعد كل ده
تيجي فجأة وتروح هادد اللي عملته وماشي!! ...
إنت عملت بالظبط زي كريم وسمية لما يقعدوا
بالساعات يلعبوا بالمكعبات وبينوا بيوت وعربيات؛
وأول ما يسمعوا أنهم تضرب جرس الباب يطلعوا
يجروا ويدوسوا غ اللي عملوه، ولا ينظرف لهم
جفن؛ ولا حتى يتدوروا ويشوفوا اللي عملوه. دول
كمان ساعات يهدوا اللي عملوه من غير سبب،
ويقعدوا يضحكوا م السعادة وهم بيهدوا فيه.

مراد:

(صمت)

- سليم: أنا كل اللي عايزه يا مراد إننا نفضل اصحاب.
مراد: طب ما احنا اصحاب.
سليم: وعايزك تفرح لي.
مراد: أنا فرحان لك.
سليم: عايزك تفرح لي لأنني قدرت أغير حياتي واصحح مسارها.
مراد: أنا فرحان لك يا سليم، وعارف إنك مش قادر تشوف ده. ونفسي إنك تفضل تغير وتصحح حياتك على طول، من غير ما تياس.

(صمت)

- سليم: إنت مش فاهم حاجة. إنت ساعات بتبقى غبي.
مراد: ساعات بتبقى اعمى.
سليم: إيه؟!
سليم: ساعات بتبقى مش شايف إلا الناس اللي قدامك وبس، وعميان عن نفسك.
مراد: ...
سليم: إنت مش بعيد عن اللي حصل لي ده يا مراد. مش بعيد. عارف كده؟ إنت قادر تشوف ده؟ أنا جاي لك النهار ده مخصوص عشان اقول لك كده.
مراد: ...
سليم: حتى انت ومرفت مم... (يتوقف فجأة)

- مراد: عايز تقول ايه؟! ما تكمل كلام.
- سليم: لأ، ما فيش. مش عايز أقول حاجة.
- مراد: قول اللي عايز تقوله يا سليم.
- سليم: ما تستعبطش على نفسك يا مراد يا أخي. ما انت
 كمان بنتشكي من مرفت.
- مراد: طبعاً باشتكي. كلنا بنتشكي. وكل الصحاب بيعملوا
 كده: يشتكوا من مراتاتهم، ويقولوا نكت أبيحة،
 ويحلموا بنسوان أجمل واصغر، ... بس مش معنى
 كده إننا نسيبهم ونسيب عيالنا ونمشي. كل الجوازات
 فيها لحظات زهق وقرف؛ وكل اتنين متجوزين
 بيفكروا ف الطلاق كل ليلة. كل الناس كده، لكن
 بيتحايلوا غ الواقع ويمشوا حياتهم.
- سليم: زي أبهاتنا وأمهاتنا وجدودنا وجدود جدودنا ما
 عملوا؟! عاشوا خمسين سنة مع بعض ف هم وغم
 وخايفين يغيروا عيشتهم؟! هو ده اللي عايزني
 أعمله؟! هو ده النموذج اللي عايزني أورثه لعيالي
 زي ما ورثناه عن أهلنا وجدودنا؟! عايزني أستحمل
 لحد اليأس؟! ولما أكبر أقول برضه لعيالي نفس
 الحكمة: أقول لهم استحملوا الزفت وكلوا خراً
 واوعوا تغيروا حياتكم؟! أقول لهم إن اللي غلط
 غلطة لازم يفضل معكوك فيها طول عمره؟! ولازم
 ينكوي بنارها طول ما هو عايش؟! هو ده اللي

بتقوله يا مراد!!؟ هو ده!!؟

مراد: مش عارف.

سليم: بدمتِك وأيماناتِك، مش انتِ نَفْسِكِ تَقْلِبِ الترابيزة علي

مرفِتِ والعيال؛ وتهْدِ المعبدِ وتمشي؟! وترُوحِ حتة

تانية تبني لك فيها معبد جديد!!؟ ما تكذبش علي.

قول لي. مش بدمتِك نَفْسِكِ تعمل كده؟

مراد: أيوه طبعاً نفسي اعمل كده.

سليم: (منتصراً) بس خلاص.

مراد: بس الرغبة دي والأفكار دي شوية وبترووح؛ بتعدّي.

سليم: ...

مراد: مفتاح الحضارة يا سليم هو مقاومة الرغبات

والنزوات؛ هو الحرب ضد النزوات التدميرية؛

معركة ضد التراجع والنكوص. ما كل بني آدم

بيغضب، وتجي له أفكار ممكن توصل لحد تمنى

الموت لغيره؛ لحد القتل. معنى كده بقى إننا نقول

للناس تعمل كده!!؟ نقول للناس كل واحد يفتح

سوستة بنطلونه وقت ما يعوز!!؟

سليم: بُص يا مراد، أنا كل اللي عايز اقله لك،

وباختصار، إنك إوعى تعمل اللي انا عملته؛ إوعى

تغمض عينيك وتعمي نفسك.

مراد: ...

سليم: أنا مش عايزك تصحى م اللي انت فيه بعد خمسين

سنة وتندم، وتقول يا خسارة العمر اللّي راح.
مراد: إنّت لسّنه مش فاهمني يا سليم. أنا يا بني لازق
لمرقت، لزقة بغرا. أنا حتة منها وهي حتة مني. أنا
ما اقدرش اعيش من غيرها. أنا يتهيأ لي لو حصل
لها حاجة إني هاموت وراها على طول.

سليم: (يتراجع) طيب. ماشي.

مراد: أصل يا سليم كل حاجة بتخلص، وبسرعة جداً.
أسرع ما احنا ممكن نتخيّل. كل حاجة بتتغير. الشعر
بيقع والقرفة تظهر، والكرش يتنفخ، والضهر
ينحني، وما تقدرش تسهر زي زمان عشان تقرا
كتاب أو تشوف فيلم على بعضه؛ ومش هاقول لك
عن الجنس، ما انت عارف. عايز تسمع خبر جديد
عليك؟ ...، ... مرفت بدأت سن اليأس. مرفت
الطيبة دي عندها أعراض سن اليأس. حرارة
وبرودة وصداع وعصبية وقلق ف النوم، ...
(صمت) ... إحنا قضينا شبابنا كله ف غيبوبة. كنا
فاكرين إن شهر العسل هيستمر للأبد؛ وإن السرير
هيفضل دافي على طول؛ وإني مش هاتصلع، ولا
هي جسمها هيترهل؛ ولا حتى إن العيال هيكبروا؛
ولا إن ممكن واحد فيهم يفلح والتاني لأ. ما كناش
حاطين خوانة. وفجأة يا سليم تصحى الصبح ف يوم
كده، تلاقي كل ده حصل. وتلاقي عيل من عيالك

بإظ؛ وإنك عندك الضغط؛ ومراتك جا لها السكر
والصداع؛ وإنك هتدفن ابوك النهارده، ويمكن امك
بعد كام شهر؛ وإنما إحنا نفسنا قَطَعْنَا ثلاث تربع
السكة اللي رايحة القبر. الدنيا كده يا سليم. الدنيا ما
فيهاش ضمانات. ما لهاش أمان. وعمرك ما تقدر
تأخذ منها إلا اللي مقسوم لك. بس برضه لازم
تعيشها؛ وزى ما هي. ولازم، رغم كل اللي قلته لك
ده، تقلق برضه بعيالك، وتقول لهم يربطوا حزام
العربية، وتعلمهم يعدّوا الشارع ازأي، وتقول لهم
الصح والغلط حسب ما تعرف؛ وتفضل جنبهم
وجنب مراتك طول ما هم عايزين. والسعادة دي
بقى نعمة من عند ربنا؛ ... يا تقدر تطلّعها من
جوّاك يا ما تقدرش، ... يا تيجي يا ما تجيش.

..... سليم:

مراد: أنا يتهيأ لي السر يا سليم هو إن الواحد يعرف إنه
لمّا بيكسب حاجة بيخسر قدامها حاجة قدّها بالظبط؛
... والعكس صحيح.

... سليم:

مراد: أنا ومرفت اتجوزنا سوا؛ وناويين نعيش سوا؛ نكبر
سوا؛ نعجز سوا؛ نتخن سوا؛ ونضعف سوا؛ ونروح
أفراح عيالنا سوا؛ وواحد مننا يدفن الثاني.

سليم: يعني انت كده خلاص يثست مني؟!!

- مراد: الاتفاق الضمني كان إننا نبقى مع بعض طول العمر.
- سليم: مع بعض؟! الأزواج التعتساء معاً؟! (مراد ينظر إليه) أنا باهزُر يا أخي. أنا فعلاً عايز افضل صاحبكم؛ بس من غير سوسن.
- مراد: ...
- سليم: بالمناسبة هي عاملة إيه؟! (متفهماً، وغير مصدق أن سليم يريد حقيقة أن يكون معهما) ... كويسة. الحقيقة احنا ما بقيناش نشوفها كتير زي الأول. بس النهار ده بالذات هي ومرفت كان المفروض يتقابلوا غ الغدا.
- سليم: إنتم قابلتوا عز؟
- مراد: عز مين؟
- سليم: عز؛ الراجل اللي هيتجوزها.
- مراد: ... آه. لأ. إحنا ...
- سليم: ف الحقيقة هو راجل لطيف. أنا ما عنديش أي حاجة ضده. بالعكس، أنا معجب بيه. الراجل ده صبر وفضل متمسك بالأمل طول السنين دي؛ وأخيراً، أه، هيتجوزها.
- مراد: قصدك إيه؟! (سليم: ما هو ده الغريب ف الموضوع يا مراد: طب ما كنا سيبنا بعض من زمان؛ وهم كانوا اتجوزوا من

زمان؛ وكنا وفرنا على بعض السنين المؤلمة اللي
عشناها مع بعض دي. عشر سنين وعيلين. كانت
تفرق كثير ف حياتنا كلنا لو كانوا اتجوزوا م الأول.
(يهز رأسه في تعجب رافض. يأخذ آخر رشفة من
فنجان القهوة وينظر في ساعته) أنا لازم امشي بقى.
أنا قلت للبنى إني هاقابلها الساعة تسعة. أصلها
عايزة تاخدني يا سيدي عشان تشتري لي كرافتات.
مش طايقة الكرافتات بتاعتي.

والله؟!

مراد:

أنا نفسي تشوف لبنى. أنا متأكد إنك هتحبها.
وبالمناسبة، لبنى أشطر منك ف الطبخ. ما هي
شغلتها بقى.

سليم:

شغلتها؟! إنت مش قلت لي يا بني إنها مديرة
علاقات عامة؟!!

مراد:

كانت. دلوقت خلاص؛ سابت الشغلانة دي وبتدرس
دلوقت عشان تبقى أخصائية تغذية.

سليم:

...

مراد:

عايزين نرتب يوم نخرج نتعشى كلنا سوا، إيه
رأيك؟ (يخرج حافظة نقوده لي دفع الحساب)

سليم:

إنت بتعمل إيه يا سليم؟! دخل فلوسك ف محفظتك
وتوكل على الله. أنا اللي عازمك.

مراد:

بطل بقى.

سليم:

- مراد: إمشي بقى؛ إنت هنتأخر على مراتك.
- سليم: (يعيد النقود إلى حافظته) طيب. ماشي. بس المرة الجاية عليّ.
- مراد: ماشي.
- سليم: سَلَم لي على مرفت. قُل لها إن الصيف راح علينا السنة دي. الصيف الجاي سوا إن شاء الله.
- مراد: ماشي. سلام.
- سليم: هاكلمك ف التليفون. سَلَم لي غ العيال. (يرفع يده بالتحية) سلام يا مُر.
- مراد: (يرفع يده رداً للتحية) مع السلامة. (ووجهه يكاد يجزم بأنه لن يراه ثانية).

(تخفت الإضاءة تدريجياً)
(إظلام)

The first part of the document discusses the importance of maintaining accurate records. It states that proper record-keeping is essential for ensuring the integrity and reliability of the data. This section also covers the various methods used to collect and analyze the information, highlighting the challenges faced during the process.

The second part of the document provides a detailed overview of the experimental procedures. It describes the setup of the equipment, the calibration of the instruments, and the specific steps followed during the data collection phase. The authors emphasize the need for precision and consistency throughout the entire process.

The final part of the document presents the results of the study. It includes a series of tables and graphs that illustrate the findings. The authors discuss the implications of these results and compare them with previous research in the field. They conclude by summarizing the key takeaways and suggesting areas for future research.

Thank you for your attention.

المشهد الرابع

(متأخراً أيضاً في نفس الليلة.

حجرة نوم مرفت ومراد.

مرفت في ثياب النوم، ومراد في الحمام المفتوح.

يدخل في فائنة داخلية وبنطلون بيجامة.

يجلس على طرف السرير)

مرفت: إنت متأكد إن سليم كان يقصد كده؟!!

مراد: طبعاً. يعني لمّا واحد يقول لك "طَبُّ ما كانوا

اتجوزوا من زمان ووفروا علينا السنين دي" يبقى

قصده إيه؟!!

مرفت: مش يمكن عايز يشوّه صورتها قدامنا وخلص؟

مراد: ما اظنش. دا ما كانش زعلان منها، ولا منه،

خالص. وكان فاكر إنها قالت لنا فعلاً.

مرفت: من عشر سنين يا سوسن؟!!

مراد: ...

مرفت: ما احنا كنا معاهم على طول. كل خميس وجمعة

كانوا معانا؛ وكان شكلهم كويس. إمتى كانت بتلاقي

وقت للعلاقة دي بقى؟!!

- مراد: يمكن بقية أيام الأسبوع؟!
 مرفت: يا خسارة. كانت أيام جميلة والله.
 مراد: فعلاً.
 مرفت: بسُ سوسن ما كانتش باين عليها حاجة خالص. إنت
 عمرك لاحظت عليها أي حاجة؟!
 مراد: أبداً.
 مرفت: ولا انا. طيب ما قالت ليش ليه؟! ومادامت ما قالت
 ليش، يبقى أكيد ما قالتش لحد خالص. طبّ وما
 قالت ليش النهار ده ليه؟!
 مراد: ما كانتش تقدر طبعاً. بعد كل المجهود اللي عملته
 عشان تزوّق صورتها عندك وتظهر بمظهر الضحية
 المخدوعة ف جوزها؟! كان صعب طبعاً إنها تقول
 لك. وبعدين أكيد من وجهة نظرها إن ده مش هيغيّر
 حاجة ف الموضوع.
 مرفت: وده معناه إن علاقتنا ما كانتش قوية ولا حاجة زي
 ما انا كنت فاكرة. وانت قلت له إيه لما قال لك كده؟
 مراد: ولا حاجة طبعاً.
 مرفت: ولا حاجة؟! ما قلت لهوش حاجة خالص؟! ...
 برضه عملت نفسك مش فاهم كالعادة يا مراد؟!
 مراد: لو انتي كنتي مكاني، كنتي قلتي إيه يعني؟!
 مرفت: كنت سألته عن التفاصيل. كنت أخذت منه كلام
 صريح أكثر ومعلومات واضحة أكثر.

مراد: إنتي عارفاني؛ أنا ما احبش ادخل في تفاصيل
الحواديت اللي ممكن توجع الناس.

مرفت: قصدك ايه؟! ...

مراد: أنا كنت حزين جداً يا مرفت. كنت حزين وانا باسمع
كلامه عن مراته وحياته الجديدة، وعن الصحيان
ستة الصبح والدش السخن والجنس والحاجات دي.
كنت حزين فعلاً.

مرفت: ...

مراد: ما كنتش قادر اسمعه. كنت باسرح منه وهو بيحكي.

مرفت: ...

مراد: أنا كنت حاسس إننا عاملين زي قطرين واقفين ف
المحطة، وماشيين عكس بعض. كنت شايفه ماشي
ف السكة العكس وبيبعد بيبعد، ويصغر يصغر،
وبعدين اختفى خالص. حسيت إني مش قادر أحبه
خالص. كأنه مات.

مرفت: ...

مراد: بس برضه عايزك تعرفي إني قلت كلام كثير
كويس؛ وسمعت منه كلام كثير كويس برضه.

مرفت: وأنا كمان. نفس اللي حصل لي مع سوسن بالظبط.

مراد: ...

مرفت: زي ما تكون فترة بحالها من حياتي وقعت مني؛
اتنشلت؛ اتبخرت ف الهوا وما عاد لهاش وجود.

- مراد: ...
- مرفت: كانت غضبانة عليّ، مش عارفة ليه؟! ... أنا حاسّة اننا مش ممكن هنرجع مع بعض زي الأول. يتهيأ لك يا مراد اننا ممكن نرجع زي الأول؟! عايزاني اقول لك ايه يعني؟! أسئلتك ساعات عجيبة يا مرفت.
- مرفت: (ترميه بالمخدة وتضحك) ... وانت مقابلتك مع سليم إنتهت على ايه؟
- مراد: على إن هو نفسه أشوف لبني؛ وإننا لازم نخرج مع بعض كلنا؛ وإنه هيتصل بي ف التليفون، .. وكده يعني.
- مرفت: وكان ردك ايه يا مراد؟! ما تخافيش؛ ما تقلقيش؛ ولا حاجة من دي هتحصل.
- مرفت: رأيك كده؟ رأيك إنه مش هيتصل بيك؟
- مراد: (يهز رأسه نعم) ... ما تتسيش تفكريني أطلع للحممة المفرومة م التلاجة. أنا وعدت العيال إنني اعمل لهم كفتة بكرة. (تبتسم مرفت دون أن يراها. يكمل كلامه) ... بس سليم كان شكله مبسوط.
- مرفت: وسوسن كمان. وكانت زي القمر.
- مراد: ما يكونش الجنس هو السبب!!?
- مرفت: الظاهر كده. (ينفجران في الضحك) أنا حلمت امبارح حلم غريب قوي.

- مراد: حلم إيه؟!
 مرفت: حلمت إننا كنا هنا، نايمين مع بعض، عادي خالص،
 ومبسوطين زي زمان.
- مراد: زي زمان يعني إيه؟! ولحد دلوقت كمان.
 مرفت: مش قوي كده، يا عجوز. ساعات ساعات.
 مراد: يعني إيه بقى؟!
 مرفت: إسكت بقى؛ خليني أحكي لك الحلم.
 مراد: إحكي يا ستي الحلم العبيط بتاعك ده.
 مرفت: طب مش قايله.
 مراد: قولي بقى يا سخيفة. والله عايز اسمع.
 (صمت)
- مرفت: اسمع يا سيدي: ... إحنا زي ما قلت لك كنا نايمين
 مع بعض؛ وكان فيه ناس تانية معانا.
 مراد: إوعي يكونوا ابوكي وامك؟!
 مرفت: لا لأ. ولا ابوك وامك كمان. كانوا اتنين تانيين؛
 وكانوا قاعدين على طرف السرير بيتفرجوا علينا؛
 وبيتوشوشوا علينا.
 مراد: سوسن وسليم؟!
 مرفت: لأ.
 مراد: لأ؟! أمال مين؟!
 مرفت: إحنا. كانوا إحنا. نسخة تانية مننا؛ بس واحنا
 صغيرين.

- مراد: ... (يلتقط كتاباً ويبدأ في القراءة) ...
- مرفت: يا غليس. قول حاجة يا غليس. ما عندكش ولا تعليق!!؟
- مراد: تعليق على ايه!!؟
- مرفت: على أي حاجة.
- مراد: لا وحياتك، ما عنديش والله.
- مرفت: ولا ولا ولا حاجة!!؟ مش ده حلم له معنى برضه!!؟
- إحنا الاتنين ونسختنا الشباب معانا؛ ما لهوش معنى عندك ده!!؟
- مراد: مرفت!
- مرفت: ... (تطفيء النور فجأة احتجاجاً ساخراً. يظلم المسرح ويستمر الحوار في الظلام)
- مراد: (في الظلام) عايز أقرأ الكتاب يا مرفت.
- مرفت: إنت قول لي بقى حكايته ايه!!؟ إنت ليه لما يبجي الكلام لحد عندنا ترؤح محول الموضوع وتهرب!!؟
- هه!!؟ ايه حكايته دي!!؟
- مراد: مش عارف.
- مرفت: أنا عايزة اعرف بجد. ليه بتعمل كده. إحنا نقعد نتكلم طول الوقت، نتكلم نتكلم نتكلم، عن الناس والعيال والشغل والأكل والأفلام، .. وأول الكلام ما يقرب منا أنا وإنت، ترؤح مزوَّغ وتمسك لي جرنان والأ مجلة والأ مش عارفة ايه.

- مراد: أصل ساعات بس ...
- مرفت: ساعات إيه؟ ... اتكلم. إزاي ما عندكش تعليق غ
الحلم بتاعي!!؟
- مراد: لأ عندي.
- مرفت: طب ما تقوله.
- مراد: يتهيأ لي إنه عن اللي بيحصل لأي اتنين متجوزين.
- مرفت: مش فاهمة.
- مراد: عن تطور حياتهم وعلاقتهم يعني.
- مرفت: برضه مش فاهمة. إنت بتتكلم بالألغاز ليه؟! ما
تقول.
- مراد: ماشي. أصل ...
- مرفت: قول لي يا مراد: أنا لسئه باوحشك؟
- مراد: (مندهشاً) إيه؟!؟
- مرفت: لسئه بتحبني؟
- مراد: يا دي الليلة اللي مش فايتة. طبعا بتوحشيني، جداً
كمان. وطبعاً بإحبيك.
- مرفت: طيب إزاي نخلي اللي حصل ده ما يحصل لناش؟
- مراد: إنتي غلسة.
- مرفت: إنت اللي غلس.
- مراد: أنا عارف إزاي نخليه ما يحصلش.
- مرفت: إزاي؟!؟
- مراد: (يفتح النور. ينهض من سريره بهدوء. يستدير فجأة

صدر للكاتب :

- راس الخوف (ومسرحيات قصيرة أخرى
بالعامية) - ترجمة ومعالجة : عصام
اللّباد - ميريت للنشر والمعلومات - الطبعة
الأولى ٢٠٠٤

عنوان البريد الإلكتروني لمراسلة الكاتب :
eellabbad@hotmail.com

تجليات أدبية

«عشاء مع أصدقاء» مسرحية أمريكية صدرت في نيويورك عام ٢٠٠٠، حصلت على جائزة «بوليتزر للدراما» وجائزة «رابطة النقاد» لأفضل عمل عُرض على مسارح برودواي في ذات العام؛ كما حصلت على جائزة «لوسيل لورثيل» كأحسن عمل مسرحي عام ٢٠٠٠.

عُرضت على معظم مسارح الولايات المتحدة وعُرضت في باريس بمعالجة فرنسية، كما قدمت كفيلم سينمائي عام ٢٠٠٢، أخرجه نورمان جويسون. تتناول المسرحية ببساطة وعمق العلاقات الزوجية في مازق منتصفها، وبشكل يمكن كل قارئ من التماهي مع أحداثها وشخصياتها تماماً.

عن «عشاء مع أصدقاء» كتب بيتر ماركس في النيويورك تايمز: «إنها مسرحية تغوص بسخرية ثاقبة في الأحزان الزوجية المسكوت عنها والتي تتسلل إلينا في منتصف العمر؛ وتتناول حالة المراجعة الذاتية وإعادة النظر التي نتابنا عندما ندرك أن الزمن يمر بنا ويكاد يتخطانا، وأن كثيراً من الخيارات التي كانت متاحة لنا في وقت ما لم تعد الآن كذلك».

مؤلف المسرحية دونالد مرجيليس هو أحد أشهر كتاب المسرح الأمريكي الحديث. ينتمي مسرحه إلى ما يمكن أن نطلق عليها «المسرح الفقير الهادئ» حيث تبعد أعماله عن الضجيج العقلاني وعن الإبهار التقني، وتعتمد في الأساس على النص والحوار؛ وهي غالباً أعمال إنسانية غير محلية تمس حياة الإنسان العادي في كل مكان.

قام بمعالجتها إلى المصرية عصام اللباد، وهو طبيب نفسى يعمل في الولايات المتحدة منذ عشر سنوات، صدرت له في «ميريت» مجموعة مسرحيات قصيرة مؤلفة ومعالجة تحت عنوان «رأس الخوف» في عام ٢٠٠٤. ولعصام اللباد رؤيته الخاصة في اختيار أعماله وفي دقة معالجاتها، وله لغته العامية المميزة والشجنة والدقيقة كما وصفها الناقد الأستاذ فاروق عبد القادر في تقديمه لعمله السابق «رأس الخوف».



ميريت